



T 3210/8546.81

21





錢塘縣志卷之二十六

人物
方技

錢塘縣知縣南樂魏嶮纂

哈佛大學漢和
圖書館珍藏印



古稱三教九流仙釋三教之別也於是而儒始尊方
伎九流之屬也於是而人物始重雖然以始皇之暴
敢焚書坑儒而獨不敢去醫藥卜筮之書蓋其道雖
形下而皆足以前民用而衛民生烏可忽諸錢塘地
大材多衆美出焉舊志方伎其間不無端人雅士今
凡能文工詩者若毛存汪元量輩或登諸孝友或列

諸文苑而至善書之家舊亦雜諸方伎則更不倫矣
今另標翰墨以別之且附工畫者於後而冠諸方伎
之前志方伎

宋

孫景璠

杭州水軍篆千字文為五十餘體太平興國八年以獻太宗善之詔去點文隸御書院以宰相

李煒

字公昭尚仁宗充國公主官駙馬都尉善章草飛白散隸畫水墨竹石亦佳仕至節度使

吳說

字傅朋師禮子楊州布衣王逢原之甥逢原有高行為王介甫所重女嫁師禮而生說善楷書虞伯生稱其深穩端潤非近世怒張筋脈之態九里松字其所書也思陵嘗欲易之御書十數卒莫能及乃命

以金飾之

元

褚煥

字士文善書與劉基友善

明

張頤

永樂五年以生員舉楷書選授禮部郎中轉刑部以王事沒于海

蔣暉

字廷暉博涉子史精楷法永樂中以有司薦入翰林授中書舍人歷禮部郎中兼侍書七十引年壽八十八卒在官四十餘年小心謹密敦友道賑貧乏未嘗責報其致仕還也楊文敏有詩贈之

林章

宣德間以楷書儒士徵當景泰時搶攘多故文告四出章勞居多累官太常卿階榮祿大夫子應禧能世其家學亦以楷書儒士廕授鴻臚寺序班與修武宗實錄累官順天府丞

吳東升

杭州前衛百戶善詩與劉士亨諸名士相倡和善署書杭城十門并各公署皆其書額淨慈寺壁書南屏二大字結構尤佳嘉靖時又有百戶施經者藝菊苦吟草書清勁類其人

徐江山

字六橋家錢塘江上正德辛巳進士官尚寶卿工真草法世宗愛其書凡御製詩文必命江山書以進當時朝野獲江山數行半幅莫不奉為傳寶餘見義行

湯煥

字堯文號隣初嘉靖乙卯舉人工書神宗時召為翰林院待詔嘗御製序其草韻辨體煥當承平時崇尚風雅便殿平臺時復宣召賜宮花金楮絡繹道塗杭人以為榮晚而家居嘗從其孫遊巷陌間歲除見書春聯者輒借筆書之其人怒煥謂之曰第言湯隣初書價當十倍其人跪謝為縱筆盡書之煥待詔金馬以資格僅為贛州郡丞有能名告歸之後家無餘金以字學為生計嘗遣女無他裝以十箱贈之皆署以乃父手書曰寄語郎君爾翁遣嫁心力盡矣歿後祀于學宮同郡許光祚字靈長得煥書法時人號

曰湯許以萬曆庚子舉于鄉知太平縣亦奇士

徐肖坡

讀書嗜古崇禎間辟為長史所著有懷清集壽八十有九猶書蠅頭小楷

國朝

顧卞

字竺公會祖某以科甲仕方伯卞古貌修髯善談諧篤於友義與吳宮詹太冲稱石交方太冲遭幽憂臥蓐屏妻子却儼從聞卞至即披衣起或破涕作笑有以徵書迫太冲者卞正色止之曰君當容病夫卞工詩善篆隸摹印嘗語人曰為我治良田十畝我為卿篆我死價堪償秦十五城後信然卒無子

施萬

字大千其先為世胄家祖虎林棄韜鈴工四聲當時藩臬若王世貞李攀龍皆折節賓友之萬以詩名尤善篆隸摹印在何震陳士衡上嘗篆八駿字與兄子之駿云異日見手澤當知吾意傳明府巖萬舊友也走婺州避跡山谷間萬歷險往從之知不可脫與巖決別曰吾可以去公不可以不勉其持正如此

卒無後士
類傷之

俞時篤

字企延少年有聲庠序與朱東觀章士斐創為古學士林咸推重之杭自明神宗時湯待詔煥

以字學應詔同郡許光祚以名孝廉受業於湯得其法煥善書晚益道勁餘杭嚴徵君調御工小楷稱精麗篤盡窮其妙請乞滿門至廢七箸老而貧頗資之以給晨夕間學畫遂與北苑南宮相頡頏每自珍重不妄下筆好事者期必得之為具以請笑授之曰此中山水清絕僅活俞生饘粥耳詩亦婉麗有法度

徐元輔

字侍筠近坡孫讀書曉大義工楷書有叔仕中州延同之任輔以父邁堅辭安居奉養撫兄孤

如已子鄉
黨重之

周邵孫

字藝功郡諸生工行草書筆意絕似懷素岳墓烈文侯祠石刻詩詞皆其筆也

五代

景獻太子

燕王德昭九世孫希懌之子也工翰墨畫竹尤佳上用善雅堂印

宋

錢昆

字裕之吳越王俶之子善畫寒蘆沙鳥於紈扇人競寶之詳見文苑

錢仁熙

武肅孫工水牛多寫紈扇歸朝為信泰光三州倅

錢易

字希白廢王第十二子畫十六羅漢極奇古詳見文苑

錢鏵

武肅第五子善畫

僧真慧

畫山水佛像為近世佳品翎毛墨竹有江南氣味

李從訓

待詔宣和紹興二朝賜金帶畫道釋人物花鳥特精妙高出流輩養子李嵩得訓法尤長于界

畫待詔光寧理三朝傳姪求年而李章亦訓之後善設色

裴叔詠 字德游建炎間裴節使之孫與楊中齋
駙馬為書畫友善寫蘭竹窠木怪石

蕭照 獲澤人靖康中流入太行為盜一日掠李唐檢其
行囊不過粉奩丹青畫筆而已叩其姓氏照雅聞

唐名即辭賊隨唐南渡唐感生全之恩盡以所能授
之紹興中補廸功郎畫院待詔其畫山水人物異松

怪石蒼幽古雅時有開封蘇漢臣工釋道人物尤善
嬰兒與照齊名西湖亭榭寺觀所畫多二人筆也

馬和之 紹興中登第官至工部侍郎善畫人物山水筆
法飄逸纖悉粉藻自成一家高孝兩朝最重其

畫嘗書毛詩三百篇命和之篇畫一圖
會成巨帙至今杭人嘗有存其散逸者

馬遠 號欽山其先河中人世以畫名後居錢唐光寧朝
待詔畫師李唐布景整齊工山水人物花鳥種種

臻妙獨步畫院其樹多斜科偃蹇至今園丁結法猶
稱馬遠云兄達亦善畫子麟能世家學然不逮父遠

愛其子多于已畫上
題麟字蓋欲其章也

劉松年 居清波門工花鳥翎毛紹興間待詔畫院師郭
禮工人物山水名過於師寧宗朝進耕織圖稱

旨賜
金帶

夏珪 字禹玉寧宗朝待詔賜金帶工人物善設墨色山
水雪景學范寬蒼老淋漓自李唐以來無出其右

子森亦
工山水

水丘覽雲 善仿米南宮作
山水又善寫照

武道光 東太乙宮道士善修補六朝
古名畫又能作花鳥竹石

左幼山 景靈宮道士善畫花鳥
山水人物師法闡次平

林椿 工花鳥翎毛瓜果師趙昌傳色輕淡入妙品
淳熙間待詔畫院賜金帶得其傳者彭臯

周詢 工界畫樓閣性高
簡故所傳不多

范彬

工人物山水師李權劉朴其弟子也

陳珏

號桂岩工人物着色山水寶祐年待詔

方椿年

工人物山水紹定間待詔

彭臯

師林椿花果寫生

朱懷瑾

寶祐間畫院待詔轉福王府使臣工山水人物樹木窠石作雪景用墨全師夏珪謹守規矩不

敢肆筆

孫必達

善釋道鬼神師蘇漢臣淳祐間待詔

李璿

師梁楷咸淳間畫院祇候

俞珙

師梁楷人物山水紹定間待詔畫院

陳清波

工西湖全景寶祐間畫院待詔

葉尚巖

作人物小景類馬遠

馬永思

寶祐間畫院待詔師李嵩嵩多令代作

范安仁

待詔寶祐間工畫魚呼為范獺子

豐興祖

工人物山水界畫花禽師李嵩景定間畫院待詔

顧與裔

專師馬和之設色不逮

魯宗貴

工花竹禽鳥窠石描染極佳尤長寫生雞雛鴨黃甚有生意

陳宗訓

師蘇漢臣工釋道人物士女描染欠精人呼為鐵陳

錢光甫

工魚精妙可愛景定間畫院待詔

謝昇 工花竹士女
景定間待詔

朱玉 號柳林善天神雷部
兵將寶祐間待詔

顧師顏 工道釋人物師李
嵩景定間待詔

史顯祖 工人物山水瑞
平間畫院待詔

張紀 師李迪工花竹
禽獸不及其師

魯莊 工人物乾道間
祇應修內司

吳迪 字泰之工梅蘭竹石蕭
散可喜號心玉道人

張茂 光宗朝畫院工山
水花鳥小景更佳

陳椿 習郭熙山水乾
道間祇應甲庫

胡錫 熙豐間以道
釋像得名

王輝 理度朝畫院祇候工人物山水釋道與李
嵩同家間用左手描寫人目稱左手王

樓觀 畫院祇候咸淳間工花鳥人物得夏珪
法與馬遠齊名學之者徐道廣宋汝志

徐道廣 號古巖工花
鳥師樓觀

白良玉 工道釋鬼神寧宗朝畫院
待詔子輝亦能世其學

馬宋英 溫州人徙錢塘至淨慈寺寫古松于壁題云磨
盡一錠兩錠墨掃出千年萬年樹月明鳥鵲誤

飛來踏枝不著空飛去了大全賞其詩畫急命索之
人忌其能闕不令出卒不遇遂成詩識其時有毛信

卿者亦溫州人善畫竹杭人最重之自云
大竹畫形小竹畫意蓋得法于趙牧之也

何青年 工釋道
人物

周鼎臣 師王輝工道釋人物

毛存 工墨水竹水石楊中齋裴德游諸人皆宗之詳見孝友

朱大洞 錢唐道士工山水人物宗蕭照

吳農祥曰按宋南渡以後粉飾太平畫院有待詔祇候而甲庫修內司有祇應官一時人物最盛而文章政事武功節孝反寂寥無聞焉可嘆也陳敬亭云武肅諸孫皆王侯世家而徒以繪事自見技雖工所造不遠矣蓋惜之也

元

金應桂 字一之號蓀壁在宋為縣令入元隱風篁嶺書法毆陽率更畫學李龍眠嘗作巖居上真出塵

觀音刻石

王正真 先名續字承之以宋內侍奉謝后北觀受命佩虎符一旦辭入山工山水墨竹學毛勿齋

陳琳 字仲美珏次子工山水人物花鳥俱師古人無不臻妙臨摹亦逼真蓋從趙文敏相與講明多所資

益故其畫不俗論者謂宋南渡二百年無此手筆也

孫君澤 工山水人物學馬遠夏珪

馮君道 工花竹翎毛性酷嗜鶴鶉常袖養之觀其飲啄以資畫筆

戴淳 字厚夫工山水

吳垕 字從禮善臨摹能逼真

張渥 字叔厚工山水白描人物

陳鑑如 精于寫神嘗為趙文敏公貌像公援筆改其所未然因謂之曰唇之上何以謂之人中蓋自此

而上眼耳鼻皆雙竅自此而下口暨二便皆單竅三畫陽三畫陰成泰卦也子芝田能傳家學

王繹字思善自號癡絕生篤志好學雅有才思年十二已善丹青亦工寫貌繼得吳中顧周道法幾于神似

沈麟字秋澗工山水師郭熙兼能寫貌山多盤聳石作雲皴頗得郭家風度

王蒙字叔明其先吳興人趙文敏之甥也仕至泰州知州流寓錢塘又隱于仁和之黃鶴山號黃鶴山樵能詩善畫學董巨源然得用墨法秀潤可愛亦善人物瀟灑文雅平生無絹畫惟于紙上作之其得意之筆常用數家皴法山水多至數十重樹本每畫數十樣峯巒重疊徑路紆迴林木叢茂烟靄微茫曲盡山林幽致與吳興倪元鎮詩畫齊名

宋汝志開元宮道士號碧雲工人物山水花鳥師樓觀

曾瑞卿字褐夫工山水師范寬

高彥敬號房山山水怪石作者鮮及一日與客遊西湖見素屏潔雅乘興畫奇石古松數日後趙文敏公為補叢竹後為戶部楊侍郎所得虞文靖公題詩其上詩不載

周如齋工山水學高房山

丁清溪道士工釋道人物師李嵩王輝尤善寫貌開元宮道士工釋道人物學李嵩王輝

丁野夫先回紇人後居錢唐工山水人物學馬遠夏珪

僧若芬字仲石上竺寺書記摹寫雲山以寓意求者漸眾若芬不自矜嘗曰錢塘八月潮西湖雪後諸峯天下偉觀挹取無盡乃向山僧乞數點殘墨即歸山家古澗蒼壁間作庵扁曰玉澗因以為號又建閣

對芙蓉峯號芙蓉峯主嘗自題畫竹云不是老僧親寫曉來誰報平安其意趣概可想也

惠崇 淨慈寺僧亦號玉澗工山水與若芬同時同號聲名伯仲

蘿窓 六通寺僧工龍虎猿鶴蘆鴈

慧舟 長慶寺僧工小竹雖千百成林而不見冗雜

仁濟芬 上竺寺僧若芬之甥也書學東坡墨竹學俞子清梅學楊補之自謂用心四十年作花園稍圓耳

耳

王淵 字若水從趙文敏公多所指授山水師郭熙花鳥師黃荃人物師唐人而水墨花鳥竹石尤稱絕品

臧良 字祥卿工花竹翎毛師王若水

黃公望 字子久永嘉人隱笈箕泉通九流百家之術尤工山水初師董巨源晚可當逸品至元中浙西

廉訪使徐琰薛為書記未幾棄去又自稱大癡道人放浪江湖年八十餘卒

宋杞 字授之鄉貢進士邃於經史善畫山水學馬遠夏珪

明

戴進 字文進宣德正統時馳名海內山水人物翎毛花草兼法諸家晚學縱逸出畦逕卓然一家為人不耐拘束時有貴官某強之畫進不肯以徽纒學之跪

階下有重進者解之乃免宣廟喜繪事一時待詔有謝廷循倪端石銳李在皆妬之一日呈畫進上秋江

獨釣圖一朱衣人垂釣水次甚得古法宣廟閱之延循從旁奏曰此畫甚佳但鄙野耳宣廟問之乃曰朱

衣貴人服也今以釣不太褻乎宣廟領之遂揮去餘幅不復閱進卒困死死後而人始重

之子泉得家法婿王世祥亦善畫

張靖之 工詩畫平生鑒別名品題跋甚多嘗作目送飛鴻手揮五絃圖為婢子所笑因題云九月十五

住杭州蕭蕭風雨生離愁閒尋敗筆作圖畫生紙爛
 墨傷昏眸小鬟立侍笑欲倒走入閨中向娘道山頭
 秃似土灰堆樹根亂若蓬蒿草空中四鳥飛橫斜筆
 濃大似赤老鴉烏紗素服一閒客坐看去鳥彈琵琶
 我生不是丹青者適興投情恣意寫等閒塗抹豈足
 言便有旁觀說高下何況嵇康妙絕倫清談曠視能
 容身女玉祥有室時手自繪繡美人圖精妙絕倫及
 嫁携歸劉氏希仁希仁者杭指揮使也舉襄成軸仍
 乞詩于靖之又題云蘭蕙情懷冰雪容生來未解出
 簾櫳瓊琚冷佩蠶房雨翠帶香披繡閣風雙玉已諧
 琴瑟調五花新受鳳鸞封明朝
 却有蒸嘗事自採蘋蘩步月中

裴日英

字文壁工花鳥墨菊坡石寓杭最久性好竹所居種竹數百竿後至京師苦無竹遂扁其居曰

鳩竹

夏芷

字廷芳師戴進筆力弟蔡山水人物亦工緻

方鉞

山水人物亦師戴進早卒

仲昂

師戴進筆力雄健

沈鳴遠

工釋道神像

盧東坡

工雲山雪景清潤不俗

陳叔謙

能玩古器識名畫其低昂軒輊分毫不爽畫師倪雲林嘗書一聯贈之博古圖蒐周漢制無聲

詩寫晉唐題

王謙

字牧之號水壺道人工梅花清奇可愛亦善書子應奇工畫梅

石銳

字以明工金碧山水界畫樓臺及人物花鳥最精緻名著一時

沈奎

字士榮花果翎毛師王若水傳色鮮麗

詹仲和 號鐵冠道人師趙子昂吳仲奎墨竹幾亂真亦善白描能草書人稱之曰詹子昂子孫重摹亦

往往售亦名之曰詹貨

俞恩 字天錫工人物花鳥性質直疎散不喜治生描染移時輒復中止故畫雖佳而所傳不多子舜臣亦

工山水人物翎毛花草

裴真 字師名以能詩名兼工繪事寫竹尤佳居鐵冶嶺下授徒自給程學士篁墩有贈寫竹裴生詩

曹振 字叔周性孝友善讀書時時好作畫得北宋諸名人筆意遂以善畫名嘗之京師一時貴官大僚無

不載金幣丐其畫振素磊落自異不善趨媚人會有以魏綾帳命振畫者振怒擲筆竟出策蹇歸隱西

湖自號玉岑山樵振善搥鼓每酒酣月落鳥履縱橫出羯鼓卸上衣搥之其聲淵淵如風濤驟集座客皆

奮袖起舞年七十卒子垣亦善畫

國朝

姜師周 字周臣豐頤廣額美髭髯性磊落豪放嘗游京師觀西山諸勝坐卧其下時關仲通以畫名師

事焉與同郡藍瑛各拈足練數丈相戒止寫獨樹高柯勿用竹石映帶嘗寫梧桐落筆數葉得秋風晨露

之致見者以為神品好邊塞遊挾妓馳馬上下數百里馬蹶輒騰而上間有所憤借優孟衣冠為兒戲師

周雖遊於酒徒然其為人沉深知大體以畫名京師朝貴過叩之匿不見魏忠賢柄國師周與大金吾邢

某善魏以鎮撫受刑將受旨起鍛鍊獄師周醉拍邢肩曰君不畏天道乎而輕為若是邢乃謝不受卒誣

坐他事遣戍魏私人崔欲得師周屏障為稱觴以他友名代求師周怒擲之地性好友聞賢豪名倒屣迎

如恐不及邢金吾贈之詩曰不合江風晚下生科頭箕踞謝公卿時時躍馬長安道博得青樓薄倖名蓋

實錄也子圖南順治己丑進士以庶吉士為侍御圖南為孝廉當明崇禎壬午巴縣再起入相圖南將上

書幼之恐累其父乃止師周笈曰是怯夫也汝果為之榮若父矣師周後以子貴贈侍御自號花酒頭陀

藍瑛 字田叔少穎異八九歲嘗從人廳事蘸灰畫地作山川雲物林麓峯巒咫尺萬里及治經生家言指河圖洛書云古人未有書先有圖圖何必不名家遂留意畫苑一皴一染皆合古人法雲間董其昌陳繼儒時相引重已謂景陵尚翰墨名蹟多集內府因裝而之燕一時王公貴卿獲片紙尺幅有如珍寶相與酬答無不傾倒自稱曰蝶

叟子孟諸生畫有家法

劉度 字叔憲藍瑛弟子已深得其筆意後更變其法師大小李將軍界畫樓臺約縮人物細入毛髮而形像宛然然亦間及他家嘗自題其畫云劉松年風雨歸舟大畫在山陰朱石門所此擬其畫法而雲光水色映筆發生此仿其萬一耳沒後遺墨雖寸縑片楷人皆奉以為寶

謝彬 字文侯上虞人隨父遊學至杭遂家焉少從蒲田曾波臣學寫真遂有名下筆高雅受業於門者嘗

數十人卒不得其法曰吾法當悟之意外非可以常格求也晚益務貴其畫年八十餘卒彬于禽魚亦點染有致其畫仙佛尤佳顧不多見

章谷 字言在十餘歲時嘗從一塾師學塾師出有友訪之羣兒忘其姓氏塾師怒谷曰母怒我猶能約畧記之因以筆畫其顴額髮眉栩栩然也塾師見而笑曰得非某乎叩之果然及長善八分書其烘染尤工絕母邁奇疾割股以進病立愈嘗抵豫章買舟歸浙有美姬附舟尾見而悅之其夕皎月明河江光如練姬不能自持數數挑之谷念此江有神倘一涉邪塋于魚腹何日復見父母乎整衣冠危坐達旦年五十餘母尚無恙每夕自誦虞初稗官之說以娛親以為常次子聲亦畫得名

華品 字秋嶽臨汀人自幼游學慕西湖之勝遂以上家錢塘工人物山水能詩善書人稱三絕 畫

六朝

徐熙 仕至濮陽太守好黃老隱秦望山有道士過飲留一葫蘆與之曰君子孫宜以道術救世當至二千石熙傾葫蘆得扁鵲鏡經一卷因精心學之遂名振海內

徐秋夫 熙子善治疾宅在吳溝橋東夜聞室中呻吟聲甚苦詢之曰我東陽人姓斛斯為樂游吏患腰痛死今在湖北雖為鬼苦亦如生君善醫故來相告秋夫曰女無形奈何鬼告以束芻為人按孔穴針之秋夫治如法鍼灸數處設祭埋之明日見一人來拜謝忽不見世服其通靈

徐道度 秋夫子精父業有脚疾不能行宋文帝令小輿入殿為諸皇子療疾有奇驗仕至蘭陵太守時杜道鞠善彈棋范悅詩褚欣遠善模書褚胤善奕文帝嘗曰天下有五絕皆出于錢塘弟叔嚮與度齊名

徐文伯 道度子有學行高邁倜儻恥屈意于公卿不以醫自業宋孝武路太后病醫俱不識文伯診之曰此石搏小腸耳為水劑消石湯病即愈除鄱陽王常侍遺以千金旬日恩意隆重明帝宮人患腰痛攻心每發輒欲絕醫以為肉癥文伯曰髮癥也以油投之即吐物如髮引之長三尺頭成蛇能動懸之滴盡一髮而已病即瘥後廢帝出樂遊苑逢一婦人有娠帝亦善診曰此腹當是女文伯曰孿生一男一女男左邊青黑形小于女帝性急欲割視文伯惻然曰請針之胎應針而落兩兒相續出如其言

徐嗣伯 叔嚮子有孝行善清談位正員郎為臨川王映所重時直閣將軍房伯玉服五石散十許劑無益更患冷夏日嘗複衣嗣伯診之曰卿伏熱須以水發之非冬月不可至十一月冰雪大盛令兩人夾持伯玉解衣坐石上取水從頭澆之盡二十斛伯玉口噤氣絕家人啼哭請止嗣伯遣人執杖防閣敢有諫者搥之又盡水百斛伯玉始能動背上彭彭有氣俄而起坐曰熱不可忍乞水予以水飲盡一升病瘥自爾恒發熱冬月猶單禪衫體更肥壯嘗有姬患滯冷積年不瘥嗣伯曰此尸注也取死人枕煮服之即愈秣陵人張景年十五腹脹面黃醫不能療嗣伯曰此石虬爾極難療取死人枕煮湯服五升即瘥沈僧翼

患眼痛多見鬼物嗣伯曰邪氣入肝覓死人枕煮服之病痊埋枕于故處又愈王晏詰之曰三病不同皆用死人枕而俱瘥何也答曰尸注者鬼氣伏而未起政令人沉滯得死人枕投之冤氣飛越不得復附體故瘥石蛻者久蛻也醫療既久蛻蟲轉堅藥不能遣須鬼物驅之故亦瘥邪氣入肝故眼痛而見魍魎須邪物鉤之氣因枕去故令埋于塚間也春出南籬間戲聞草屋中有呻吟聲嗣伯曰此病甚重更二日不瘥必死乃往視見一老姥稱體痛而處處有黥黑無數嗣伯還煮湯斗許令服之痛愈甚跳投床者無數須臾所黥處皆拔出釘長寸許以膏塗諸瘡口三日而復云此名釘疽也

徐雄

文伯子亦傳家業尤工診察其他詳見孝友

徐之才

雄子文伯孫幼而儁發善醫術兼有機辯少解天文圖識之學有患脚跟腫痛諸醫不能識才曰蛤精疾也由乘船入海垂脚水中所致之才為剖得蛤子二大如榆莢之才術最高時被詔命齊武成

沉湎酒色恍惚不恒病發自云初見空中有五色物稍近變成一美婦人去地數丈亭亭而立食頃變成觀世音之才曰此色慾過度大虛所致即處湯方服數劑疾遂愈帝每發遣騎追之針藥輒効後小定更不發和士開欲依次轉進以之才為兗州刺史及帝病復發語士開曰浪用之才外任使我辛苦勅驛追到已無及矣又有以骨為刀把者五色斑斕之才曰此人癩也問其得處云於古塚見觸髅額骨長數寸試削視有文理故用之其明悟多通如此

宋

郭昭乾

字汝端汾陽五裔祖遠授宋建隆二年節幹世稱六八節乾昭幹自祥符初由汴徒杭州多隱

德施與不倦有異人乞齋郭膳之潛遺牡丹花三朵覆几上而去追詢之曰若累世陰德故來相報花上書婦人症十三方若子孫世世用之無窮如法試之無不奇驗遂為婦人醫郭氏以醫名自昭乾始三傳

至曾孫時義高宗建炎元年孟太后疾召醫義以母
 馮氏應召依牡丹方治之脫然愈封安國夫人賜田
 賜葬賜藥碾如鐵舟然又賜第海昌賜國姓至今海
 昌稱趙塾里 國初裔孫欽誥靖溥皆名醫而溥尤
 以孝友為世重欽
 誥子瀧亦以醫名

錢乙

字仲陽吳越王俶支屬父頴善醫喜游東之海上
 不返乙方三歲母前死姑嫁呂氏哀而收養之長
 誨之醫告以家世即泣請往跡尋凡八九反積數歲
 遂迎父以歸時已三十年鄉人賦詩咏之乙事呂如
 父呂歿無嗣為收葬行服乙始以顛顛方著名至京
 師視長公主女疾授翰林醫學皇子病瘵瘵乙進黃
 帝悅擢太醫丞賜金紫由是公卿宗戚家延致無虛
 日廣親宗子病診之曰可勿藥而愈其幼子在旁指
 之曰此且暴疾驚人後二日過午可無恙其家恚不
 答明日果發癘甚急召乙治之二日愈問其故曰火
 色直視心與肝知俱受邪過午者所用時當更也王

子病嘔泄他醫與剛劑加喘焉乙曰此是中熱脾且
 傷奈何復燥之將不得前後溲與之石膏湯効一士
 病欬而面青光氣哽哽乙曰肝乘肺此逆候也若秋
 得之可治今春不可治其人祈哀強之藥明日曰吾
 藥再瀉肝而不少却三補肺而益虛又加唇白法當
 三日死今尚能粥當過期居五日而絕又乳頰困悸
 而病既愈目張不得瞑乙煮郁李酒飲之使醉即愈
 所以然者目系內連肝膽恐則氣結膽衡不下郁李
 能去結隨酒入膽結去膽下則目能瞑矣乙本有羸
 疾每自以意治之而復甚嘆曰此所謂周痺也入臟
 者死吾其已夫既而曰吾能移之使在末因自製藥
 日夜飲之左手足忽攣不能動喜曰可矣使人登東
 山得茯苓大如斗以法啖之盡由是雖偏廢而風骨
 悍堅如全人以病免歸不復出乙為方不名一師於
 書無不窺不靳靳守古法時度越縱捨卒與法會尤
 邃本草諸書辨正缺誤或得異藥問之必為言生出
 本末物色名號差別之詳退而考皆合末年攣痺寢
 劇知不可為召親戚訣別易衣待盡卒年八十二

靳儻

其先本三晉人唐時有靳恒者知開封府居官謹

京之顯仁坊隱居市藥每日設漿于肆以濟行者宣

和間有二道者日飲于靳氏靳氏事之歲餘不懈因

曰吾試若耳若長者子孫當有厚報因書數語授之

言訖不見視其所授則秘方也試之小兒奇驗高宗

南渡扈蹕至武林遂世為太醫數傳至從謙為御直

翰林醫官賜勅特晉三階出內府百子圖賜之命以

所出巷為百子圖巷靳氏之有百子圖自南宋紹興

三年始也靳之後有起蛟著有本草會編國初起

蛟之子鴻緒著有內經纂要其業甚精子咸吉謙皆諸生以醫名世

李信

汴人小兒醫也官院判從高宗南渡遂家于杭之

義和坊高宗危疾詔信入侍因年耄賜安車入禁

時號李車兒信八世孫瑤于明永樂時亦召入

禁官御醫始移居北郭植槐于門子孫字因槐

陳沂其先汴人唐乾寧時有仕良者以醫名于時奉勅

修聖惠方官藥局奉御子孫遂世其業數傳至沂

益能闡先世之秘建炎中扈蹕而南遂為錢塘人沂

嘗治康王妃危疾有奇効賜御前羅扇凡宮中有疾

欲不時召之者聽持扇入禁中金吾閣侍皆不得沮

止仕至翰林金紫良醫子孫標木扇象之至今稱陳

木扇有名諫者尤精先業治人所不能治之疾決男

女生死保衛胚胎術往往多奇中所著有蓋齋醫要

今子孫以醫世其家

邢氏

忘其名醫術甚奇時韓侂胄知閣門事將出使俛

之胗脉曰和平無可言所可憂者夫人耳知閣回

輒日恐未必相見也韓妻本無疾怪其妄誕不倫然

私憂之泊出疆甫數月而其妻果報卒朱勝非子婦

偶小疾命視之邢曰小疾爾不藥亦愈然不宜孕孕

必死其家以為狂言後一歲朱婦得男其家方有抱

稽清

字仁伯世傳秘術善療金瘡骨損父初出汴扈蹕

南渡時戎馬蹂躪全活甚眾金人入寇帥臣請俱

值兵潰因失所在事聞命清攝職年未冠早諳先業
 官中有患折股者他醫莫能措清為整治完好壽皇
 躬親騎射時有誤損應期而瘳中外益重之先是大
 江以南良醫凶鮮正骨一科尤所罕觀清既著名日
 有扶疾就視者續斷起廢輒見奇効其後有勝者侍
 明武廟以雜科顯掌院事卒于官至今稱稽接骨焉

羅知悌 字子敬以醫侍穆陵甚見寵厚丹溪朱彥修志
 下三載始得見知悌愛其誠盡以其術授之彥修遂
 以醫名東南知悌能詞章善揮翰貧病無告予之藥
 無不愈者仍贍以調理之資

吳農祥曰宋南渡太醫亦扈蹕南徙如大方脉醫有
 金杵曰紅媳婦帶下醫有陳木扇郭醫產小兒有百
 子圖李車兒耳目痺醫有金蝦蟆畫兒陳瘍醫有金
 耳朶稽接骨獸醫有醫馬陳或恩出上方或錫隆宮
 禁或物標其奇或名從其實莫不湔浣腸胃漱滌五
 臟咸以扁鵲復出能生死人矣歷元及明四百餘年

國代變遷而諸醫家無改至
 今猶名盛一時稱為十世家

元

李調 字孟言號樗散生師楊維禎負氣節善詩賣藥
 金陵病者無不與與者無不瘳蓋賢而隱者也

宋會之 名醫也治水蠱碎乾絲瓜入巴豆十四粒同炒
 獨用瓜炒陳倉米而去之研成丸服百粒其言

曰巴豆逐水瓜象人絡僅藉為引
 而以米投胃氣是深知醫意者

范防禦 以顛顛醫名五世有孫思賢思明並敦尚孝誼
 思賢療徐一夔子不能乳思明療岳冲伯子疹

皆衝雨戴笠奔赴之立愈
 兩人比之入井往救云

倪居敬 父厘瘍醫巨擘敬承家學及諸家方論除教授
 至保冲大夫命同知江浙財賦以非其職不受

也民避兵露宿而疫者藉全活無算治他奇疾尤立
 効開平王迎置左右厚酬之優游湖山以終時有中

和堂潘氏滋德堂徐氏徐之子鎮少年活人獨多而鎮之友蔣正齋知病虛實亦有名于時

徐靜隱

善療杖傷藥力所及快若飲元霜紺雪

吳觀善

字思賢其先沐人自其曾祖從明徙邑為小兒醫其業本外家范防禦范又傳外家徐防禦之

術而至善尤著

明

劉均美

號閱耕讓產異母弟以閭右實京師居善藥先丐者後市者邑人許坊客死美殯殮歸其喪解

縉楊士奇俱為歌詩稱之晚年術益精活人益多年九十卒

吳恕

字如心博學而貧善治瘋疾徵至京師授太醫院御醫恕念傷寒為病傳變不常張仲景傷寒論旨

意深幽莫窺其要乃潛心研究為賦以發其隱復纂指掌圖以開示初學仲景奧旨闡發無遺業醫者往

往宗之

吳綬

著傷寒蘊要全書發明五運六氣畫圖立說究極淵微以名醫徵至京仕太醫院院判有病傷寒者

諸醫議用承氣湯邀綬曰將戰汗矣非下症也當俟之頃刻果得戰汗而解

葛林

字茂林工小兒科名聞京師成化時命內臣徐來杭驛致之充太醫院官時武廟方在嬰稚皇太后

保護甚周每召供御一夕武廟癘疾作中外惶怖夜分召林一七而安明日使與宴有白金彩幣之賜注

比部有子年二十五矣痘已愈醫皆以為無恙也林視之怫然曰災其在彌月乎至期而其子晏然注置

酒高會若以謂林者林視其子之足底有泡結癥膚內曰吁其百日哉及期果暴歿注問其故林曰痘者

構形之餘穢也苟有纖芒未盡必無生理是疾初發自腎而不能暢是以言其必死既而流注于足故發

之緩耳注歎服少師楊公子當暑而驚眩已絕且就木矣林趨入曰無傷也亟出之公曰兒已噤矣奈何

劑也林曰予無劑也所望者天上雲耳雲生而凄凄欲雨陰氣舒而陽鬱消吾以清利物者煮水而蒸于下其可瘳乎如其法而疾愈迨暮而兒戲于庭矣林貌清癯骨削而目睛炯然其視疾得其聲色洞若燭照既而切脉以决死生莫一遁也善制方劑其應若響官至太醫院院判八十八而

卒所著有杏塢秘訣一卷

蕭氏

不哀僧一日拈筆畫一牡丹遺之蕭初不甚珍重藏既久發視之花瓣中皆有字隱隱可見蓋古醫方也大異之令婿郭某按方試之療人皆奇効後又令聚藥煉為丹俄見爐上有花絢燦若牡丹狀丹成如黍珠用以活人雖瀕死皆甦自是蕭郭之醫傾動一時

孫鈍

字公銳嘗遇異人授却老之術年踰九十肌若處子精於醫四方叩門求治者無虛日有皇甫泰者與之齊名時稱孫皇云

錢寰

善小兒醫嘉靖初徵授御醫侍天子疾有効陞右通政

翁禹訓

字汝守幼穎異父念其羸弱令治醫家言取黃帝以下書及諸禁方讀之務研其奧有奇驗寒暑不乘輿張蓋獲醫資隨以濟人及抵家待以舉火者又滿座終不吝施與也四十失明處一室訓子孫多貴

顯

諸餘齡

號雲泉善書奕博通醫家言而多新得四方爭巾車馳城中起人於死者何得身為死人馳喪車出城乎當終于此耳與徐鏗輩諸名醫為天醫社子夢環隆慶辛

未進士

盧復

字不遠習岐黃兼通大乘與子之願善療奇疾凡尸蹙迴風投劑無不立愈復嘗著本艸博議蓄疑未决後見之願私論奇之曰此子當自成一家言遂授使續之之願折衷先說廣所未備編輯成書即世

所稱本州乘雅者是也生平著述甚富皆不傳傳其醫云

陸彬 字嗣文忠宣公後裔自平湖徙于錢塘彬少敏達精扁鵲倉公之術明熹宗時隨大父京師以精醫

授聖濟殿侍直太醫院吏目旋奉旨教習醫學懷宗屢召入視皇后皇太子疾徹御饌賜之陞醫御上林苑監右監丞掌南

院加光祿寺卿

吳元溟 字澄甫自歙徙錢塘先世精醫萬曆浙大疫同父道川躬治療之日活數千百人晚年述父意

著書曰痘科切要兒科方要事繼母以孝聞女弟少寡無以依元溟迎養于家終身無間言性慷慨喜急

人之難故人程生負課千金久繫元溟即代償之崇禎庚辰歲大飢元溟出橐金于江右糴米五百斛悉

散于親友與同郡王道焜雲間陳繼儒嘉定黃淳耀交俱有終始授光祿大官署丞年八十二而卒孫秋

价別有傳曾孫觀垣康熙癸卯舉人觀域已丑進士元孫國鑣壬午舉人子孫二百餘丁其以文學列郡

縣庠者不下數十人

王允曙 其先有復者為宋名醫蕪文忠公顏其亭曰種德贈以詩世傳至允曙術益工明天啟間召入

京師除院判旋以父疾告歸尤善療金瘡折傷有中矢貫兩耳者允曙為塗贖脾藥得不死有腹為牛角

觸裂腸胷盡出為納腸敷藥卒無恙江干范某與人鬪被重創幾絕治療旬日竟愈人謂鵲陀再世云

國朝

王佑賢 字聖翼孝友天性甫九齡七日中父母相繼歿哀毀踰成人禮孤貧勵學旁通醫術急人病不

以門第為等差所全活人無算家居力行皆盛德事尤好刊格言以訓後學有古梅宋元間物出暉使朱

勤臣家撫軍高聞而愛之移官舍忽枯死適召賢入署覽玩不已撫軍因顧謂曰子能起疴吾移置子家

試活之移歸而梅果花一時羣以返魂樹名之以為賢療人亦猶是也 國朝年直指雲龍旌善士哀然

居首所著有格物近篇內經
纂要子遜亦以岐黃名于時

任二琦

號瑞庵本姓韓忠獻公後裔扈蹕而南家于杭
先世授神術于任數傳至二琦伎益精凡醫嬰

兒藥濡口即瘥名振郡中自王公下至輿隸無不攜
扶奔走其家二琦悉與善藥或見貧窶甚不能具藥
餌者遽揮袖中金置兒襁褓中人故飲食必祝思肖
像祀之二琦早失恃事後母張孝嫁三妹婚一弟皆
成禮城東火廬幾燬忽返風滅火人謂其孝義所感
二琦家故貧冬月衣單紗做巾風雪中往還後以醫
馳名生產饒裕臨終誠其子曰人有陰德
天必佑之汝曹善守家聲毋墜世業也

姚應鳳

字繼元少孤隨姑適姚遂氏姚以瘍醫知名能
隔垣見臟腑其法不盡本方書類有異授割皮

刮骨一見洞然凡疲癯委頓呼號欲絕者鳳入視病
即已人皆以為神崇禎時撫軍喻思恂駐師温州拒
海賊劉香受降有日毒發于背幾殆召鳳至為割腐
肉斗許洞見五臟隨以丹藥傳之越二日癰平開轅

門受香降撫軍深德之嚴州施姓三載患頭痛不可

忍鳳曰法當取首中骨今八月時收斂難猝治期以

明歲春割額探去其骨病愈鄭孝廉尙友患流注穿

漏垂死鳳曰氣從下洩難奏功乃取藥作糜周身封

以敗楮隙肩井穴吸之而愈一叟患脹滿諸醫多云

隔症鳳曰此肺癰耳令病者閉目取一大盂水向病

者頂上傾之病者陡驚急舉刀直刺心坎注膿血斗

餘而蘓人問之曰人心下垂水潑而驚驚則心提吾

刀可入也沈夫人患嗽血晝夜不止鳳曰肺慮萎不

慮潰今潰至二葉尙可生也先投洗肺湯已令食猪

肺愈嘗有人患發背視之曰可無恙也旁一人左唇

有紅痣無他病苦謂之曰此齒盡也三年必死其人

怒不應三年齒潰詣求救謝曰君天譴也不能過期

矣有人身患痛左臂似有條之者鳳曰君食內中鼠

毒左臂生鼠用刀決之有鼠墜地而逸一人頂瘡求

治鳳曰此天斫頭瘡宿因也三年頭當自落而死竟

如其言一人遍體發小疥如粟鳳曰是名淨海瘡不

治生治死其人不信治之死鳳于奇疾多屢中率此

類賦性樂易逢人無貴賤視之若一所施藥餌無算藉以全活者甚衆一日忽端坐召子孫環列謂曰我本曇越也今去矣跌跏而逝鼻柱下墜二尺餘年七十有七官太醫院判

閔自成

字思樓性孝友幼失恃父喪明出入扶掖不離者日不暇給仁而好施遇貧乏輒不受值直指使楊旬瑛聞而旌之年七十一夢吏持牒迎至老鹽倉社遂坐逝子振儒諸生亦擅軒岐術

沈好問

字裕生少孤力學世業小兒醫至好問益精視小兒病必洞見臟腑尤善治痘症沈勤雲義女年十歲幼子痘女抱兒出眵好問曰兒無傷女即出惡痘矣若呼頭及骨痛宜服糞清如其言而愈閔家女阿觀年八歲出痘甚惡好問曰諸醫云何對曰死症不必藥矣好問曰兒一身死痘然有一生痘尙可生令取五年抱雛母鷄用藥入鷄腹外以糯蒸鷄令食盡視之右手寸關脉痘二粒明豔如珠女果生江

魯陶子一歲痘止三顆見額上耳後唇傍好問曰兒痘部伍心腎脾三經逆傳土尅水水尅火宜攻不宜補攻則毒散補則臟腑相戕治至十四日痘明潤將成矣好問曰以石膏治之恐胃土傷腎水俗醫憐兒小謬投以參好問見之驚曰服參耶不能過二十一日矣兒卒死許季明幼子痘好問曰順症也不必補小陽純陽陽盛必尅陰許不從痘愈譏好問爲妄好問曰兒且死許益不悅至十二日兒熟睡視之絕矣好問爲杭小兒醫所全活甚衆子允振亦能醫

金塗珂

字潤寰仁山先生後裔也曾祖麗泉爲海內知名士張豕宰瀚江學士鐸皆出其門仕至工部右侍郎忤權倖退居西湖以醫業遜世塗珂少有神童之目比長遵母命業醫雖讀書萬卷不拾糟粕極難險症從容處之嘗云古之名醫者曰和曰緩倉遽奚爲耶無富貴貧賤悉以平等心治之若鰥寡孤獨不惟不取值輒有貽贈杭城內外所全活者不啻億萬人著有明醫醫鑿外科精微體仁編兒科慈幼錄

諸書子燦亦有
名克紹父業

任允謙

號谷菴二琦長子生而端凝善讀書少補博士
弟子員性至孝方居父喪柩在堂隣人不戒于
火且迫及允謙着衰麻挽引之不動撫棺號呼烈燄
中會都督王公率兵救民居見之感動因命健卒數
十昇棺而出允謙稽顙王公馬前聲氣俱盡公嗟嘆
良久曰此真孝子也克承世業以醫濟人無貧富貴
賤悉殫心珍視應手立效著有邁種堂集性理析解
普慈鑿案諸書行世子芳孫鶴齡皆嗣其業杭人數
百年多稱
任小兒云

李吳

字三英南宋御醫信十一世孫吳故業儒後乃謝
諸生工世業博學有膽識尤精痘科遇險逆症眾
不能治者吳入視輒應手愈嘗言醫之用藥如布基
須占定先着若見某症始議用某藥則已落後著矣
所謂以藥候症毋以症候藥也名曰甚和寒暑雨吳
不恤勞悴晨起襁負其子而至者吳悉與藥以去日

酬應漏夜猶不休息惟視病之生死為緩急不以貴
賤分難易以故人咸稱之吳早失恃承事寡母惟謹
性慷慨立然諾嘗破家以濟友人之難事有裨于鄉
黨者無不力為之年六十有六卒子肇基培基俱國
子生能
世其學

張所望

字衛生溧陽人後徙錢塘性敏悟工岐黃術兼
以瘍醫知名理安寺一僧患水疔走黃絕水穀
者已三日眾莫能治延所望入視曰毒已入內奈何
須下一針方可因向瘡頂刺入寸餘始聞痛聲曰生
矣隨以膏塗之復投丹藥數粒拔其疔根錢許堅黑
如鐵遂愈一婦產一子忽叫痛欲絕舉家驚愕莫措
所望診之曰腹內尚存一子未下投一丹而子下母
遂甦其活人多此類年六十八卒子良樞猶傳其業

潘楫

字碩甫精靈素之學賣藥都市中人以韓
伯休比之所著醫燈續談世奉為要秘云

馬更生

字瑞雲少學醫于婦翁周業已成未敢試周好
奕一日有貴人疾革請周令更生往一劑而愈

由是名大起嘗出見暴死人曰此可活人多不信啟其齒灌藥而甦能預決人死生至期輒驗

馬如銓

字恕菴精岐黃家術應手立愈兼負俠氣遇不平事輒攘臂爭之章庶常為市僧誣陷幾不測

如銓憤然曰冤哉計某月日我刻刻在庶常家視太夫人病庶常不離床第哭泣不絕聲一月以來足不履闕外彼固孝子也而獄成天理滅人心絕矣因欲

直赴當事代白之每謁見要路慷慨激烈曲陳顛末甚至聲與淚俱如銓與章非素相識也而仗義乃爾

他如親友中藉以排難解紛者不可枚舉訓子孫讀書皆有名孫

甲丁酉科副車

燕士俊

字仲章祖志學以醫名俊傳其秘治病多奇效以上醫

五代

僧師簡

丹丘人居西湖旁院擁破衲衣預知杭越間灾福輒記之驗若合符喜為人遷山相塚吉凶如

其言長於書額書成相之便知寺觀向後安否卒後人有見之長沙市者

葉簡

善占筮一日武肅坐衙忽旋風南來遶案簡曰此淮師楊渥薨當遣弔祭王弗信簡曰但遣弔渥果

死一軍皆驚時有李咸者筮類與簡同

宋

謝石

蜀人紹興八年來臨安拆字多神驗有樊將仕書失字卜妻所亡珠冠安在石曰從姓朱人行二十

八者求之可得也曰是吾內兄安有此曰在占宜然歸詢諸家朱嘗假帽不用而返啟視之冠果在帽下

又一選人病書甲字以問下有燥筆石曰丹田既燥必死矣期當在明日申時果然石初入京師徽宗書

問字命一隸往石緘封之戒其到家方發封隸歸奏上啟讀乃曰左為君右為君聖人萬歲遂補承信郎

有道士亦以問字占石曰門雖大只有一口蓋所住觀無他黃冠也猶未以為奇復以器字占曰人口空

多皆在戶
外始大服

韓慥 賣卜三橋曾侍郎遠李太史伯恭往卜時宗子趙
待先在慥首言趙可至郡守多貴子不達者亦卿

郎次及曾李語皆神驗而趙至岳州守子
汝述為尙書迺遠遇皆卿監郎語尤驗

耿聽聲 不知何許人能聽聲知吉凶貴賤故名其嘍衣
物亦如之德壽聞其名取宮人扇百餘雜以上

及中宮所御令小黃門持扣之耿嗅中宮扇曰此聖
人也然有陰氣至上扇乃呼萬歲上奇之呼入北宮

又取妃嬪珠冠十數示之至一冠奏云此有尸氣時
張貴妃薨此其故物也家在候潮門內夏震微時嘗

為殿帥餽酒于耿耿聞其聲知其必貴遂以女妻其
子時郭棟為殿帥耿謁之曰君部中有三節度使他

日皆為三衙扣為何人則曰周虎彭輅夏震也虎輅
時為將官獨震方為帳前佩印官郭曰周彭地或未

可知震安得遠爾乎耿曰
吾所見如此已而悉驗

夏巨源

精卜筮居臨安中紹興間有自贛造朝而遺其
文劄者卜之巨源為作食堯字且曰獲在女口

守以鴛鴦無虞也其人莫識所謂既而僕從饒州持
所遺至蓋其妾福安收藏鴛鴦字篋中也始服其神術

白羊先生

姓氏籍里不傳賣卜臨安市中紹熙甲寅孝
宗升遐光宗疾不能喪中外人情洶洶襄陽

兵官陳應祥歸正人也欲乘此為變結約已定其間
一卒買卜于先生詰之曰此卜將何用觀此占非止

殺身且將危及父母矣慎勿為吉其人色動時都統
馮湛帳前適有一人在旁知之遂潛跡至一茶肆與

之語給以已得罪于湛倘有所謀願預一人之數卒
始不肯言再三問之乃以實告但深以下不吉為疑

其人曰若疑其不吉當與汝同首可轉禍為福卒然
之然恐無驗乃引其人詣陳曰此人都統帳前人也

近偶得罪可為內應陳始不信再三言之乃與以白
巾一告以期約其人與卒急詣湛告變時張定叟作

帥湛攜首狀告定叟時定叟方卧起與湛密議定復
就寢徐令具酒餚與客飲遣數人請陳及其他一二

兵官同來面以首狀白巾詰之陳詞屈乃集眾於教場射殺之二人及白羊先生皆補以官

僧妙應

江南人佯狂知人休咎蔡京罷居錢塘相其貌似虎書壁有看取明年作宰相舞爪張牙喫眾

生之句又書云眾生受苦兩紀都休悉如其言嘗語姚令聲午日伍胥廟見榴花即禍至聲任杭不敢登

吳山後令江山來參帥憲偶避雨小廟見榴花問之即伍廟也時正午日未幾中秦檜禍死

布袍道者

不知何許人賈似道嘗馳馬出遊湖山小憩棲霞嶺下道者瞪視曰官人可自愛重將來

功名不在韓魏公下賈意其見侮既而醉博平康至于破面他日復遇道者頰足嘆曰可惜天堂已破必

不能令終矣後悉驗

元

李國用

自北來寓杭州能望氣占休咎兼相術但崖岸倨傲時貴亦頗敬之謝后諸孫有某者延致之

即據中座省幕官皆下位不得其一言時趙文敏公

為司戶陪席風瘡滿面李遙見即起迎謂坐客曰我過江僅見此人面瘡愈即面君矣公輩記

取異日官至一品名聞四海後果如其言

戴厚甫

精遁甲法其母忽見紅光貫室開幃視之一美女獨立榻前拔金釵遺母母以語戴答曰適祭

遁神遂至此耳遁母見將死矣悒悒踰月而卒

夏榮

邑尉也候郡守裴叔敞疾曰公無虞獨夫人當禳耳問之曰使君合三婦三年取三姬厭之厄過矣

夫人曰寧死耳其年果暴亡敞更取二姬

明

僧如蘭

富陽人善相術于肅愍少時博戲市中如蘭見之曰少年何不自愛異時救世才也時有道人

在旁曰相如斯已乎如蘭更熟視曰惜不令終道人曰和尚可教矣問其姓名不答而去

程山人

自玉山來寓褚堂精太乙軌運主客算卜六壬之術萬曆辛巳有問來歲事者山人曰明年五福在燕太子生建臨大將冲文昌主將相失位太乙理天在女主寵奄去建格始擊主水灾是年誕生皇儲而張居正馮保俱罷歲又逢潦其言悉驗後歸隱不知所終

李春耕

餘杭諸生贅邑孫氏人以其博學稱為行秘書經史而外于天文尤盡秘奧嘗按步天歌操杖指垣野星示人歷歷與歌合又作通曆

國朝

程良玉

字元如新安人天性穎異五齡以痘瞽父憐其早慧令習醫耳聽心受遂悉其要十歲告父母曰醫主望聞問切既不能望術詎得神遂去而學卜從茗上張星元受書問訊記憶盡得秘奧然卒本于易若田何丁寬京氏之學莫不洞見本原每占一卦即爻象貞悔陰陽動靜而人之吉凶悔吝燎若觀火

其說一準于用爻費卜武林車馬填接街陌日已瞞簾猶不得下言人人殊靡不奇中如是二十年性强記曾從玉卜者雖十餘年後一聞其聲輒能呼其姓氏賢士大夫爭相引重咸以為管輅郭璞云至四十四得數見兆慮術不傳乃鍵戶著書三年易冒成遂卒

朱有志

字浩齋三歲聞讀書聲輒喜至成童耳一過都成誦經史典籍靡不通曉而尤深於易遂精術數之學往問者輒得奇驗而恒以自晦不欲以此知名亦能詩夷然自得陶靖節風韻

徐啟龍

字石麟少穎悟隱卜雲居山下斷人之吉凶休咎其應若響以故搢紳當事咸諮訪焉年八十而卒子天行能紹其業以

宋

汪元量

字大有度宗時以善琴出入宮掖詳見文苑

張震 字子昭精于律呂詳見文苑

明

冷謙 字啟敬居吳山曉音律善鼓琴洪武初以黃冠見高皇帝自言能諧律呂及命陶凱定大雅樂謙與有功焉樂成授協律郎詳見仙釋 以上音律

論曰凡推步卜相醫巧皆技也雖小道亦本於聖人自後人為之或出於誕或託於偽故聖人不以之教人唯醫者濟世之道而學之者眾然不能悟之以天徒事積習終不精也夫上古聖人妙陰陽之理精五行之用窮萬物之情而達之以神明乃可以參天地

贊化育後之人能讀其書者鮮矣况予智自矜者乎以予所聞武林前輩名醫如盧復王佑賢姚應鳳李昺閔自成諸君子皆以通儒擅黃岐之術其所著書亦多所發明非庸庸者流也若書與數亦六藝所不廢而明湯煥及

本朝俞時篤皆有文章名世乃僅以其工書列之方技豈非各掩其實者乎

錢塘縣志卷之二十七

錢塘縣志

列女

錢塘縣知縣南樂魏



自乾坤成道而男女以分淑慝別其德貴賤殊其等
 非有關綱常名教世道人心者例不得載列女猶人
 物也其類有七曰后妃賢而又貴者也次則有賢媛
 有孝女貞女有烈婦節婦有壽母巾幗鬚眉凜然正
 氣於以扶綱常名教而培世道人心豈曰小補之哉

志列女

后妃

吳

武烈皇后

吳氏孫堅聞其才貌欲委禽父拒之堅慚恨后謂親戚曰何愛一女取禍乎遂許婚為堅

夫人初孕夢月入懷生策及權在孕又夢日入懷以告堅堅曰日月者陰陽之精極貴之象會稽功曹魏騰嘗忤策將殺之后乃倚大井謂策曰汝新造江南方當優賢禮士舍過錄功曹在公盡規汝今日殺之明日人皆叛汝吾不忍見禍及當先投此井耳策大驚遽釋騰及權少年統業后助治軍國甚有補益建安間曹操責權質子權將周瑜詣夫人前定議瑜曰將軍承父兄餘資兵精糧足將士用命所向無敵有何偏迫而欲送質后是公瑾議因曰公瑾與伯符同年小一月爾我視之如子也汝兄事之引見張昭等屬後事尋薨合葬高陵黃龍初追尊武烈皇后

五代

恭懿太夫人

姓吳氏名漢月中直指揮使珂之女幼以婉淑奉文穆王元瓘而生俶天性慈惠節

儉居常布練而已每聞王決重刑常輦蹙以仁恕為言外家每有遷授皆峻阻之及入見多加訓勵有過失必面責之故諸王終夫人之世不甚驕恣勅封吳越國順德太夫人薨謚恭懿

忠懿王俶妃

孫氏名太真性端重而聰慧每延接姻親洎諸宗屬皆盡恩禮好學讀書通毛詩魯

論之義尚儉約非受叅謁宴會未嘗為盛飾俶之征毘陵也孫居國城內時時遣內侍撫問諸將及從征將帥之家外稟畏奉如王旨漢乾佑二年奉制拜夫人周顯德末勅封吳越國賢德夫人宋進封賢德順睦夫人開寶九年隨俶入覲勅封吳越國王妃

宋

章懿太后

李氏初入宮真宗以為司寢既有娠從帝臨砌臺玉釵墮妃惡之帝心卜釵完當為男子左右取以進釵果不毀帝喜已而生仁宗初仁宗在襁褓章獻以為已子使楊淑妃保視之仁宗即位妃嘿處先朝嬪御中未嘗自異人畏太后亦無敢言者終太后世仁宗不自知為妃所出也事詳呂夷簡傳慶曆中改謚章懿升祔太廟以后弟李用和為彰信軍節度使檢校侍中寵賚甚渥既而追念不已顧無以厚其家乃以福康公主下嫁用和子瑋

明

孝惠皇太后

邵氏憲宗妃世宗祖母也父林昌化人入杭州為賤業后知書有容色年十四聘者七人皆死後許一指揮親迎墜馬死其父充漕卒攜至京師選入掖庭憲宗聞之曰杭州兵家子耶居外院未得進一夕月下詠所著紅葉詩憲宗過而微聞之遂召幸成化十二年册為宸妃二十三年為貴妃

生睿宗及岐雍二王睿宗分封興國后不得從為賦思親焉世宗入繼大統太后老目青喜其孫為帝撫世宗身自頂至踵世宗元年前上尊號曰壽安皇太后嘗言女子入宮至苦飲食起居皆不得自如以後選女母下江南亦見我開恩于江南女子也在宮闈五十餘年莊順自持不私其家每戒諸弟姪曰吾家起行伍賴祖宗積德荷國恩至此汝輩慎位保身毋負國恩費上尊謚孝惠康肅溫仁懿順協天祐聖太皇太后合葬茂陵

賢媛

宋

梁氏

韓斬王夫人京口娼也嘗五更入府伺候賀朔忽於廟柱下見一虎蹲卧鼻息麴麴然驚駭亟走出不敢言已而人至者眾復往視之乃一卒也因蹴之起問其姓名為韓世忠心異之密告其母謂此卒定

金州縣志 卷之二十一
三
非凡人乃邀至其家具酒食十夜盡懽深相結納資以金帛約爲夫婦斬王後立殊功爲中興名將遂封兩國夫人斬王嘗邀兀朮于黃天蕩幾成擒矣一夕鑿河遁去夫人奏疏言世忠失機縱敵乞加罪責舉朝爲之動色其明智英偉如此

元

李氏 登州黃縣人鄒世聞妻性貞慧知禮其在父母家及事舅姑動中禮法足跡不出戶限世聞用門功爲管軍百戶南戍錢塘錢塘士女競事游衍子確謂其昆弟曰盍亦奉吾母爲樂乎治游具請于母母曰吾聞婦人晝不游庭而可遠適湖山恣逸樂耶確等慙懼退有女嫁同邑周仲賓仲賓調贛之瑞金簿非辜就逮女仰天嘆曰吾夫死必矣吾出門安適遂投舍後池內死談者咸謂得之母訓云至正間世聞分守海寧有惠政張士誠陷浙西屏居硤石元亡不食死

明

張氏

張一賢女南軒先生後裔歸吳太冲性儉勤具遠識事姑沈先意承志惟恐不及沈亦憐愛之太冲官京師以詞臣屢上疏爲當局所忌或謂之曰夫人盍不諫乃公國家事豈汝一家物耶淑人正色曰是何言夫爲忠臣我獨不能爲忠臣婦乎已太冲遷南京國子監司業流賊寇淮北鋒火逼江而下太冲分守聚寶門晝夜卧城樓上張居官署一男病幾死不使太冲聞事平謂太冲曰賊非不欲渡耶爭河北耳河北破江以南未可安枕而卧也其明智如此甲申之亂太冲削髮去淑人遷居海寧朱氏居數日飭移行李已而朱氏毀于兵移海鹽曹氏居數日又戒行李行已而曹氏家又被禍或問夫人何以先期知之張告之曰兩家皆素貴民所嫉也而家又不自晦余是以知之淑人卒太冲哭之慟曰吾失吾良友矣謚之曰賢孝

裘氏

裘自謙女自謙為淮陽長史母徐常感動疾裘割股以救母及歸陸運昌昌為諸生貧糟糠不厭泊

如也亡何昌舉孝廉文名馳四方而其父某以痿廢

孺人盡毀嫁時裝進甘旨外治具供賓客冬月常衣

葛帔練裙昌舉進士授江西吉水令以廉著孺人同

之官相對言古循吏以勗之昌為令七載不入吉水

民一錢庚辰仲子培復舉進士第次年明亡昌遽卒

京口乙酉培復自縊桐塢孺人遂與其子圻皆垣堦

上居駱郵合門課農桑將終老焉秉性惻隱有犯法

當徒者助以贖鍰又有為兄所逐及以妻質者周以

金若米而使復之中表楊氏娶居有欲潛易其志者

孺人破散其謀又脫璫珥嫁沈氏姑氏生高貴家又

身都貴顯中間頻遭困厄然夫為廉吏子為忠臣氏

實相而成之子培之婦趙進士應元孫舉人爾昌女

食貧自甘事姑以孝聞子圻之女為

吳薦妻亦恂恂孝謹皆不幸早卒

陳氏

顧恒字妻御史豹文祖母年三十恒宇遊粵客死陳哭幾絕啟舅曰夫無祿旅櫬萬里外奈何子大

觀年十二涕泣請奔喪與祖俱陳念舅老子幼跋涉

崎嶇哭益淒切及柩歸橐裝已不可詰乃訓子經營

為生計長孫媳張氏亦端淑夫沒坐一室豹文成進

士僅遣女鬟詣媿處一叩頭賀族從姻婭雲集如勿

聞者苦節三十餘年

子之珩庠生能文

陳氏

行人陸培妻初育于其姑遂為沈氏女沈父病甚割臂肉以進立愈十九歲歸培奉翁姑尤謹乙酉

培將死難與訣曰國亡與亡吾分也母老子幼敢以

相託慎毋輕言從死遂自縊變聞孺人方樓居自樓

上投地支體盡裂絕而復甦復不食者十四日垂斃

父伯符勸之不得已強飲食焉始培未第時祈夢於

忠肅公祠夢延入加禮別時語培曰君臣氣結夫婦

禮訣後卒驗培兄圻以他獄被逮無男女少長皆就

繫孺人亦不免子繁弨有友曰錢榘以白金奉橐餽

費孺人見金遽吞之不死主者大驚即攜其子就母

獄使供養頃之事竟得白孺人年老嘗語及培

至太孺人平昔讌笑事夫嘗不欷歔流涕也

國朝

朱氏

顧大觀妻年十八歸大觀性謙淑動有禮法乙酉江寧潰卒南走杭人震恐爭攜家奔避姑陳亦欲渡江東歸泣留不得乃命子豹文侍以行已獨留視門戶後音問梗阻因日夜泣目遂失明遇良醫療之得差乙未豹文成進士令真陽以荒僻勿獲迎養思棄官歸又以勤職業報國恩諭止之戊戌豹文補御史馳封孺人勉以殫心國事壬寅冬卒大觀兄弟同炊四十餘年娣姒更司出納間謀析箸輒相持泣其子姓化之皆歸雍睦

許氏

趙廷標妻太寧縣知縣文胄女賢明知道廷標由貢舉起家官巖疆數經危殆皆許相之永定之初平也賊兵環攻者一年飛矢如雨礮震城樓欲圯者數矣廷標登陴以守許曰勉之臣殉國妻殉夫義也事若不克請為君先死卒全永定乃遷衡陽又分守長寶時李定國從武岡乘銳而下湖南震動許曰賊

乘勝而驕且退矣宜擊之已而竟退計廷標由閩入楚入滇入粵已復入楚所至皆鋒鏑要害之地許為策成敗定堅瑕繕甲胄調餼糧者且四十年以勞瘁卒於湖南官舍廷標為之慟哭曰失吾內助喪吾良友矣康熙六年覃恩進封恭人

方氏

新安人徙錢塘適同郡朱登召登召以才氣為故司李蔡懋德所知薦為臨川主簿已遷參軍於廣西柳州又改福建漳州俱不赴值鼎革攜方及二子歸行至龍溪時亂兵阻道轉抵西安丙戌大兵至城下登召與二子先後被掠方氏獨處僻室惟一男一女從男三歲女五歲耳聞信乃大哭曰時移家破一至於此吾當殉汝父地下顧汝姊弟幼小無知懼流落辱門戶惟當偕死耳乃舉剪刀先刺女後刺男旋自刺入喉寸許方創巨三人俱暈絕室中游騎過聞呻吟聲破壁見母子三人宛轉血泊中驚嘆而去為隣媪所救得不死三日登召同其兩長男歸相抱而哭卒無恙登召卒方教其子輅有成立孝友稱于鄉

黨間

傅氏

侍御傅巖女巖與其舅宮詹吳太冲相好遂以女許字其子農祥滄桑之交巖殉娶城之難而太冲為僧姑張迎之歸傅悲逢家門之禍終身不言笑布衣蔬食如居喪禮性仁慈識大體故人罹患難者多依之以衣食家貧減衣縮食以周之人以為難生丈夫子五皆口授詩書嘗泣謂曰汝輩讀誦非教汝干進取也但當知義理無負乃父乃祖足矣將死出其敝絮以為歛曰吾去侍吾舅姑父母從遊地下勝人間戚戚也子裕婦徐氏徵士林鴻之女亦孝謹有姑風夫弟亮夫婦偕早世遺藐姑二徐為之撫育視如已出竟以勞成疾卒

張氏

幼喜讀書明大義長歸徐林鴻性儉約不事紛華治閭政必以禮佐鴻于艱難力操作嘗惴惴惟恐有失鴻嘗客于外能健持門戶宏博之選張力止之謂公孫側目子超涕泣大可慮也君有聲藝苑久矣

蓋堅辭之况寒士媒進身之路諸貴必開倖進之門此行未可賀也其見機明决如此後鴻以疾歸隱欣然曰是可以全其節矣他若孝以承歡慈以逮下義方以訓子孫終其身無疾言遽色親黨宗族無不各當其意僉曰是當代女宗云

黃氏

吳嘉謨妻幼聰慧過人後遂博覽融貫羣書年十三值明末兵燹交作舉鄉惶迫氏從容指陳利害設方畧為保護計境賴以寧事舅姑以孝聞內則壺儀戚族奉以為師家貧甚舅沒脫簪珥營墓于西湖龍井之麓有白鳥巢墓之異子蕙蓀諸生氏出手訂左傳韓文授之曰古今文章盡在此矣年既高猶不釋卷每與諸孫景輩論古今事反覆引證或至終夜論者比之曹大家云卒年七十八學使者翰林彭公始搏聞其賢題孟教班才額旌之

沈氏

明經章士斐妻士斐八歲而孤事繼母高至孝高故相國文端公儀曾孫女歸士斐父纔十月而寡

年甫二十二士斐幼孤又遭家難恒苦饑不得食母子相倚爲命隨二十年方娶氏氏與其姑高起居相依高執爨沈操井曰提甕出汲人共嗟嘆之士斐試有司早有名諸生間專務讀書不解治生產一日館舍歸沈言無米者再士斐作無米詩遣之沈笑勉勉有無無難色姑久病幾殆氏朝夕侍湯藥唯謹已而念服藥久則胃氣傷遂以已意變通易甘脆羹湯進之姑由是起士斐先高卒高年已七十六矣哭其子極哀因失明又痿一足氏扶持出入者又二年乃卽世氏哭之慟曰吾夫恨無以報母至鬱鬱死死猶念母不置今姑復棄我我何以獨存哽噎不食者累日治喪祭如禮終其身儉約析無新衣澣濯縫紉無虛日常稱其姑言以教子曰而父幼孤貧無師傅猶克自樹立今汝兄弟有父母師長無苦衣食乃勿自策勵耶言畢泣下子三人皆能文長戡功諸生早卒撫功明經藻功康熙癸未進士選翰林庶吉士沈年八十有八病革彌留之夕子若孫及女婦內外諸孫三十餘人環侍人人皆有遺訓神明不亂云

沈氏

處士蔣名登繼室名登稱孝子別有傳氏舉二子弘德弘道訓以義方織紉澣濯儉勤自持處士佞不求贏而遇人急難輒解贈之氏畧無阻色隣不戒於火氏先奉神主及家乘置隙地次攜子女出走後復火出門迷所向有老人導之前行至外家老人忽不見氏幼時聞兵亂抱弱弟寘密室而身匿窖中經宿皆無恙嘗見天樂引幡幢縹緲行空中急呼母共視俄散去其母年九十沈日奉飲食以爲常戒子孫歲時必展其墓次子弘道亦孝子父卒弘道廬墓側哀號者歲餘旣免喪每月朔望必素服至墓前哭祭蔬食二十餘年氏年八十有八神明漸衰弘道與其妻王力事之不能食匕之食不能起掖之起雖極貧參餌必時進遠近聞者咸以爲世德云

盧氏

適許昭遠性至孝其事舅姑尤篤孝母鍾氏疾篤盧焚香拜祝願以身代割股進之是夜假寐有神告曰汝母壽算已盡今憐汝孝得延數載未幾果愈又享壽十餘年而終父病下利盧侍湯藥衣不解帶

目不交睫者數月
後以積勞得疾卒

方氏 宋賜春妻歛人年十四歸春事姑許以孝稱崇禎元年春始徙家於錢塘姑得奇疾方嘿禱五祀請

以身代鬻左臂為羹以進三七而疾已姑得復生者三年已而春罹疾幾死方復割右臂以飲春亦愈方有子四人世傑世賢世彪世榮賜春及方病劇時傑賢各割左右臂以救而賢得危症彪復剜股以活兄兄弟四人創痕宛然皆方有以感之云

方氏 諸生胡承虞妻甫于歸而承虞即負笈出游方事其祖母與母兩世皆得歡心祖姑與姑先後疾篤

方割臂襍羹中以進立愈後承虞歸亦病方又剜左臂以進亦愈越數年承虞復疾甚於昔醫皆謝去方曰吾臂三創三愈幸邀帝鑒今獨不可四創乎效前法烹和以進夫復霍然君子曰至誠格神方氏有焉
尚氏 許鼎昌妻先籍山西後居錢塘事舅姑以孝聞甫舉子舅忽病膈醫禱皆不效氏語昌曰人乳最益

人吾聞昔時有乳其姑者盍試之因自以乳進翁翁疾漸愈時方哺兒分以乳舅左乳遂枯及姑蔡疾氏累月不解帶勞甚右乳復枯姑卒死氏長號曰姑舍我去乎一慟而絕康熙十五年有司嘉其孝行旌其門

李氏 馮厚妻厚以孝謹稱李實佐之性嚴正有鬚眉節

概事姑谷得其歡心後姑疾李禱於神願以身代夢神人以玉杵指之曰以若夫婦之孝也益汝姑算矣會厚割股襍糜粥以進即愈厚嘗欲周人之急謀于李李曰此義舉也君市義何不可乎親踈咸賴以濟年五十九而卒卒之日知與不知皆為哀涕

王氏 徐增瑛妻幼嫻姆訓博通經史十六歸增瑛貧無

立錐備極難苦惟事女工以佐薪水謹事孀姑温清必謹湯藥必嘗年二十割股救姑姑克永年鄉里稱為孝嬪有司旌其門子振鏢性至孝亦割股救親一門稱雙孝焉 以上自盧至王共六人舊皆入孝嬪今并入賢媛

楊氏

王元佐妻幼習女紅攻書史及笄歸元佐佐父時

十餘年卒卒時涕泣語人曰我久病之軀得優游暮

年無疾痛呻吟之苦者皆新婦力也元佐居家動循

禮法不問家人生產日課子讀書氏篝燈午夜佐其

勤子道寧有聲庠序順治戊戌秋元佐感疾不起孺

人泣顧孤子曰汝父中道棄捐吾忍死視汝成立不

媿未亡人矣方居憂隣火不戒道寧伏棺長號卒完

樽出自此家益貧無以奉菽水道寧患之孺人曰而

無庸而不聞古人以善養不以祿養之語乎道寧唯

唯勉出就館舍青燈寒夜思孺人則泣明發省慰率

以為常歲乙卯復為隣火所燒六七年間屢櫻融祿

室中所有蕩為煙塵孺人不色動喜讀書如列國

傳及女箴閨訓皆能舉其本末卒年七十六歲

潘氏 王法平妻及笄歸平家業中落日事女紅會舅寅

地墓舅復謂平曰姑青年守志子若婦惟以不得懽

心為慮遂竭力事奉姑病危篤氏割股入藥愈姑疾

後姑卒氏力疾治喪曉夜哀哭四十七歲卒臨終以

姑與夫尚在淺土囑子裕霽曰汝能急葬吾目方瞑

學使張希良旌其門曰 雙孝流芳祀主表貞祠

王氏

張恒源妻通經史賢孝性成上事舅姑得其歡心

勤女紅漏下十刻不少息取辦修瀆撫育子女并治

夫喪備嘗辛苦歿年僅四十有七氏之祖母茹著有

閨門軼事氏嘗為註訓有詩文二卷名 內言學使彭始搏旌其廬曰節媿松筠

聞氏 庠生李逢春妻聞本蕙族而氏布衣推作以奉其

姑事事曲體姑意侍姑病至忘食卧月餘以勞卒

家人慮姑知而戚也諱之密為治喪姑小愈偵知強

起出寢撫其柩大慟曰失吾孝婦我何生為哭仆地

鍾氏

國學生陳鳴霄妻甫結褵遂遭舅喪氏從帷室中

涕泣襄事凡飯含絞衾之屬咸躬理焉弔者稱之

乃益知氏之孝云

乃益知氏之孝云

乃益知氏之孝云

乃益知氏之孝云

乃益知氏之孝云

乃益知氏之孝云

乃益知氏之孝云

乃益知氏之孝云

乃益知氏之孝云

乃益知氏之孝云

乃益知氏之孝云

乃益知氏之孝云

乃益知氏之孝云

乃益知氏之孝云

乃益知氏之孝云

乃益知氏之孝云

乃益知氏之孝云

事孀姑克盡孝養霄弟鳴謙鳴玉俱未成立門高產薄見者咸以為憂氏語霄曰此君手足有無當與共遂勸霄稍治生計而一切家事身獨任之為鳴謙娶於羅為鳴玉娶于朱鳴玉早卒無子氏憐之言于霄以次子為之後及朱卒氏仍撫其子俾其樹立曾不以為人後者稍差降也性仁慈尤篤于妯娌間甘苦與共長姑適楊早亡遺一女氏女之擇婿以嫁下至踈親未戚時分給所有以濟之不待請而後與也生平甘淡泊勤操作卒之日年逾六十鍼縷刀尺織室機絲猶勤晝夜若氏者艱辛勞瘁電勉終身可稱賢婦也

王氏

贈光祿大夫徐翼鄰妻吏部尚書潮之母也氏事翁姑能先意承志晝績宵緯佐夫子讀書後生潮

兄弟益勉以力學雖囊篋屢空左支右絀一不令潮兄弟知也及潮官翰林欲謀迎養氏以姑老力辭翁姑卒喪盡禮遠近稱孝至京即適潮典江南試氏庭立而詔之曰必公且慎毋貽吾憂隨司秩司空又

諄諄以國計相戒飭入朝啟事必先夕令謹視奏帖

退朝聞溫綸則喜故潮居官勤恪終身邀主眷勿

衰湘令粵之長樂氏諭遣之曰勿通苞苴勿侵國帑

為吾累即汝孝每使至輒問治狀聞善政則喜且加

餐葢氏之以官箴教子者類如此他如內外姻戚下

逮臧獲無不體卹備至晚事佛最虔持佛記圖火之

灰隆起若繪畫如來狀後一人寶珠瓔珞隨之則氏

像也一時傳觀稱異事焉贈一品夫人七十三歲卒

二爰氏

處士爰昭叔之女吏部尚書徐潮妻也昭叔初以第三女字潮八年而卒即以弟女繼之初爰

來歸時潮甫為諸生貧甚而祖姑猶在堂姑王未老

王事姑唯謹爰每隨其後敬扶持之王奉盤匱滌灑

爰必趨而代之遂以勞弱致疾不起昭叔因以其季

復歸焉季在室時聞其姊事重闈皆得其歡心迨歸

悉如姊所以事祖姑者事姑而兩姑皆愛之痛其姊

之早亡撫其女踰所生而獨嚴以教其子時潮已貴

顯矣而爰恒儉約自持無翠羽珠璫之飾相其夫持

大體有采蘋采蘋之風潮先典試江南事竣有以飛

語聞京師者姑憂之甚父慰之曰君子公慎自矢必無他慮也已而果息及巡撫河南慮封疆任重難以報稱父曰盡心盡力不敢有欺所以報也訓其二子本杞曰汝曹毋以富貴驕人立品植學以繼而父世篤忠貞吾所望也及本杞皆登第父已下世矣二父皆以夫貴累贈至一品夫人

秦氏

文學沈子龍妻孝事舅姑甘旨必潔姑錢嬰療疾氏親嘗湯藥衣不解帶歷二十年如一日龍家素

貧氏勤女紅給薪水兩姑出嫁脫簪珥以備奩具雖極艱難拮据不以為瘁訓二子蘭先蘭或有方曰汝曹能以善養正不必以祿養其待子女臧獲皆有禮法不以聲色加人子蘭先世稱儒宗崇祀鄉賢

蘓氏

趙蒼璧妻庠士琦女幼純靜寡言笑蒼璧遭父廣德變孑然藐孤琦識之曰忠孝之後必大遂以女

女焉年十七入門事姑以孝聞家秉瑣屑事事親操蒼璧得專意治經成名進士歷臺諫有聲方蒼璧宰麻城賊倡亂逆焰甚熾有謂蘓宜出避者屹然不可曰是先去以為民望也卒贊城守功是則尤巾幗中

識力之卓卓哉

陳氏

庶常章藻功妻處士陳祚明之女也少嫻內則舉止有大家風範年二十二歸章奉兩世老姑俱得

其歡心藻功故貧士陳勤織作以供菽水辨色而起漏下四鼓不少休服飾典質都盡嚴寒衣不絮藻功館于外勿知也太夫人言之為黯然動色陳笑曰春風將至煖矣君行且富貴何戚戚婦人女子為嘗午炊不火陳脫銀簪以質米會有友以絕糧告者即分半給之左右不可陳曰彼以我為知己故來請可拂其意乎體素羸一夕嘔血數升而藻功次日適宴賓客陳強起執爨親刀匕終日不言倦竟以勤苦而卒年三十有二易簀之頃執藻功手曰事君十年鬱鬱辛苦所不敢言言亦未能盡也願異日毋相忘藻功有悼亡文載思綺堂集人競傳之

馮氏

文學吳觀至妻觀至喜交遊負氣誼氏相其夫有德曜少君之風事舅姑能執嬾道觀至兄弟同居

氏處姊姒間不為貴陵不為賤下撫前妻產如已出子七人教之讀書克成立有名率子婦必儉必勤且督以苦難諸務謂人生緩急時有若輩苟貪安逸一旦遭拂意豈復能存活耶由是各率其教人謂去河東藍田不遠云

劉氏

永嘉尹銓女適儒林郎孫敞敞以父嘉琰命出嗣世父後劉輔敞盡孝養終不失本生志高堂兩地

問視日無間所後親復舉子劉分腴就瘠姊姒雍睦做沒後教子如嚴父晚年出遊湖山間子之驥引板輿行人皆稱之

邢氏

徐行志妻歸徐事姑篤孝嘗割股以療姑疾又著閨誠諸書皆原本理學言與聖符卒年八十餘稱為女中師範

官司旌表焉

王氏

徐天任妻至性過人父母病姑病皆百藥無效以割股愈之天任病又自割臂和藥識鑒明朗知大

體天任讀書雲林隣人火攜幼子奉兩尊人并先世所藏撰述以出曰此先人遺澤不可失也母德婦則彰彰在人勤儉以佐夫成名詩書以教子若孫人世所不可少不易能者皆務其實不飾其名而又無溢禮無缺情焉徐氏世多婦德此尤足稱女宗矣卒年六十有九長子樹歲貢生次子栩郡諸生並有才名

張氏

毛元錫妻年十八歸錫經營在外終歲不歸氏搯門戶姑呂氏患瘵氏親調湯藥不離卧床者十年

子衍祚艱于子嗣嘗契買江干一女氏見其日夜飲泣問其故知為舊族憐之謂祚曰此女係孝廉某之曾孫女爾雖艱于得嗣不可以名家女為妾理當送歸但恐又鬻他姓當傳其父來令擇昏以全其終身因擲契還之不取其值其父擇壻已定嫁之氏復厚贈其奩具焉嗚呼氏可謂賢已

陸氏

凌克闇妻素以賢淑稱治家勤儉訓子有方初為凌氏婦值大火逼廬凌遠遊四明家人悉奔竄陸

泣奮力負老姑冒烈火以出夫死數十年整理家政內外肅然壽至八十一卒

趙氏

凌爾雅妻幼慧通書史事祖父母父母以孝聞及歸凌事翁姑如事父母性甘澹泊不苟言笑戚黨中罕有見其面者姑常病劇趙垂涕籲天請以身代竟以哀毀過情而卒閭里稱為孝婦

金氏二女

共適鄭以姊妹為娣姒皆孝於父父金廷先無子卒其族子仁甫不良欺廷先無後鬻其

墓地止留容棺處數尺二女不忍謀贖之相與泣曰昔緹縈曹娥能捐身救父不幸無子男我二人坐視父棺將暴何以生為然其家貧甚遂共斥其衣服簪珥之具以贖焉未幾仁甫并鬻其數尺隙地二女又相語泣曰吾家益貧力不能再贖奈何相視無計遂奔訴邑令周宜振令憐之責其族子獎二女語以出二女遂歸家為人傭作刺繡文之餘繼以澣濯縫紉忍饑餓并日夜以所得直償之地主憫其孝為讓直之半由是父墓處得無恙歲時伏臘祭祀拜掃俱以女代男鄉黨莫不嘆息賢之子鄭沈壽為博士弟子員有

文名

論曰余讀春秋外傳而後知聖人之用意深而立教

平也外傳述魯語僅三十餘事而記公父文伯之母

者八且釋敬姜不書而書公父文伯之母公父文伯

之母云者以其得母道甚也夫國語所錄皆君卿大

夫繫典章之重者若敬姜唯寢門之內自治其業者

爾何足書然而其言則禮經之所從出也其行則律

已之肅也祀先之恭也佐夫以忠而教其子以無墮

先人之業也所為典章者不過是矣然而語其常不

語其變言其易不言其難有叔向之母亦有介子推

錢塘縣志卷之二十八
之母有鮑宣之母又有范滂之母為叔向之母易為
子推之母則難鮑宣之母處其常而范滂之母遭其
變也夫難與變不可以為訓故易之家人曰君子以
言有物而行有恒而記則曰何謂人義父慈子孝兄
良弟弟夫義婦聽長惠幼順君仁臣忠如是而已緣
聖人之意以為高節畸行雖焜耀一時然必遇其難
值其變而非人情之所願故取其常且易者以為是
家之禎祥也此聖人立教之意也故於貞節之外錄
所謂賢媛者若干人以求合於內則云

錢塘縣志卷之二十八

錢塘縣知縣南樂魏源纂



孝女

唐

馮孝女

少孤不嫁以養母母病刲股後母死號慟嘔血
既葬結草廬墓下日焚香蔬食刺臂血寫佛經
仍舍宅為寺以薦母長慶三年詔賜束帛仍賜寺額
日報恩今錢塘縣有孝女南北二鄉又有孝女墓在
寺後山
古城頭

元

陳孝女

父業儒居胭脂領下元統乙亥兵火故居蕩不
復存聞殊勝寺設粥供日携孝女丐食僧頗憐

之畱衆寮供榜疏職有李知事者亦寓寺傍一見投
合畱之館穀孝女亦得其家歡心居數月女忽謂其
父云吾母墓在故居側數年不至矣聞主人將爲湖
山游能乘此一往拜掃否父以告李欣然與俱既至
墓所拜奠李偕其父飲傍舍女悲泣不已久之父勉
之還則泣告曰比聞李氏今將北歸吾父子必將從
之父老子勿南北萬里何日可再至吾母墓下言訖
躡踊呼號聲振林木久而仆地視之死矣因耐母塚
之傍時年
甫十四云

胡守貞

守貞父母及其長弟相繼歿止幼弟宗信相依
信長娶婦王氏志清五年而信復死生子貢暨
一女守貞謂其嫂曰我終不可以嫁矣清曰姑與妾
夫兄弟也視妾子猶子也姑以吾夫與吾子故且不
嫁妾爲人妻爲人母而可再醮乎兩人相向哭誓死
守存胡氏亂食臥起相依宛如姊妹然每日鬻書得
錢粗足供薪水輒閉門治女事雙杼一燈依倚者
十九年洪武甲子子守貞年六十卒貢行三年服

葉妙清

榮女早歲喪母躬浴其屍取水注甕中哭則掬
而飲之茹素十餘年坐臥儼若見母者初榮代
其伯成彭城永樂間累立征討功拜千官臨歿語女
曰吾出萬死得一官今不幸中道死子震幼弱族人
利吾官者行將不利於震後母年又少汝將若之何
語未既女哭應曰請得侍我母全撫我弟令嗣父勲
終不從婚媾去遺父憂榮卒媒氏至輒峻拒之後榮
有兄子麟果欲奪震官百計誘女嫁女剪髮碎面以
明已志且則爲震禱於神晝則勤女紅至夜分不寢
竟育震成襲父爵終身不嫁繼母王氏弘治間受旌
獨不及孝女餘杭
鄒幹爲著孝烈傳

壽母

明

錢氏

適儒士顧端性質樸不喜鉛華克敦婦
道壽百有四歲有司旌其閭曰百歲坊

蔡氏

黃思道妻思道隆慶庚午舉人歷代州知州氏端靜簡厚無他嗜好教子克謙孫機俱慈惠有方克謙官叅議氏猶澹樸長齋脩佛壽百有四歲後以孫大學士貴封一品太夫人

陳氏

汪瀨母舉孝廉不樂于進歸志湖山恒以不獲祿養母為言氏憫之曰吾志也年至九十八歲終其孫霽丙辰進士以博學鴻詞選翰林官至禮部侍郎贈淑人

金氏

顧鼎臣妻壽九十九歲巡按王公某表其門

國朝

王氏

杜榮德妻事兩世姑俱孝謹氏素強夜不喜寐燈下課諸孫讀危坐無倦一日忽呼諸孫曰吾覺有氣拂拂從頂中出中秋日吾將歸矣如期而逝年百歲子志濠時年亦七十矣踰數月隨沒

丁氏

民馬成妻年百歲自子迄曾元凡五世無疾而終

余氏

諸生朱養蒙妻孝養其舅者二十三年養蒙卒孤甫十二歲嚴督就塾躬操作者七十年始授管鑰於其子婦曰吾今稍可自逸矣年九十四卒

陳氏

嚴炬妻夫婦齊眉至老相莊炬年九十有九飲食如少年顏色腴好氏亦九十有三里人稱之曰人瑞是年先後卒

馮氏

太學生馬從景母康熙五十六年氏壽九十有四矣邑人請載邑乘有曰青年矢節白首完貞云

張氏

江士瀛妻士瀛物故子一鯤方九齡時值歲歉氏勤儉操作備嘗艱苦夫死方七日而鄰火告警氏力扶櫬出子鯤年八十先卒孫鴻禧年六十二弟鴻祚年六十曾玄森立四代兒孫俱氏撫育綠髮紺瞳壽百歲有一有司先後旌表節婦而兼壽母稱盛世之閭瑞云

烈婦

三國吳

徐氏

孫翊妻翊領丹陽太守時嫪覽戴員思欲叛逆其所昵邊鴻亦怨翊徐善卜翊他日欲餞諸長吏命

徐卜之徐言卦不佳可須異日翊不聽乃大會賓客翊出入嘗持刀時徒手送客鴻從後斫翊殺之走入山徐氏募追捕中宿乃得諸將皆知覽員所為力不能討覽悉取翊嬪妾欲復取徐徐恐逆之見害乃給之曰乞須晦日設祭除服潛語翊舊將孫高傅嬰等圖之至期設祭哭畢乃除服薰香沐浴更於他室施帳帷覽密使覘視無復疑意徐呼高嬰與諸婢羅伏戶內使報覽已除凶即吉惟府君命覽盛服入徐出戶拜覽便大呼二君可起高嬰俱出共殺覽餘人即就外殺員徐乃復衰經奉覽首以祭翊墓

元

黃氏五烈

朱氏黃仲起妻至正間張士誠寇杭驅諸婦至今令監守期暮且至朱懼辱遂與女臨安奴

俱縊死妾馮氏曰我生何為亦自縊既而仲起弟婦蔡抱其幼子與乳母湯皆自殺一門五烈

朶那

杭城東偉兀氏之女奴也年十九勤敏謹愿其主官他郡卒朶那奉主婦惟日謹至正二十年秋七

月十日寇陷杭劫官民府庫至偉兀氏家無所得乃縛主婦柱下欲殺之侍婢皆散走朶那獨以身蔽主婦且告曰將軍所利者財豈利殺人哉家之寶貨皆我所藏主母固勿知若免主母我當悉與將軍寇喜即解主母縛乃探金銀珠玉幣帛等物置堂上寇爭取之又欲犯朶那朶那持刀欲自屠曰我主二千石我誓不從他姓主况汝賊乎寇驚異捨而去朶那泣拜主婦曰棄主貨全主命權也妾受命主鑰失貨而全身非義也請從此死乃自殺時人重其義烈

明

魏氏

蕭山人名德盛文靖公女孫幼有志操涉書史擇配錢塘儒士鄭璽贅於家璽回杭得暴疾德盛往

侍湯藥祖母與俱行比至壘已暝德盛至夕以帕自縊於尸側祖母解之歸渡羅刹江欲投水死祖母挽之抵家欲自縊家環守之斷髮爪面齒無名指流血不止死弘治間奏聞表其門曰孝烈

顧氏

適秦某業醫不售兼病痿廢貧甚為父母所逐無所得食日惟掬水取腐渣咽之病且死謂顧曰爾與我同餓死無益孰若更事他人爾既得所天吾亦幸須臾無死顧飲泣不答數日秦父母携酒饋來視其子相屬為耳語顧度其必以已市也因却不飲食比夜呼女出井上汲水令返取罌即窺入井死明日出其屍衣裳內外俱紉綴固密不令見體事在萬曆初時年二十有九

陳氏雙烈

都御史陳潛夫之妻妾皆孟氏本姊姊也丁亥師下紹興潛夫沉淵死妻慨然從之妾呼曰姊少待我遂把臂俱沉於河

陳氏

朱道弘妻弘挾醫術僑居石門適海寇至人盡走陳抱持幼子與道弘相失遇賊迫之同行給賊稍寬置幼子井傍投井中死時嘉靖丙辰歲也

國朝

傅氏三烈

莊氏傅元英繼室錢氏元英子與霖妻陳氏弟世禎之婦也乙酉夏游騎抵武林城中人四竄與霖奉母莊及妻錢弟婦陳同往全家避兵騎麇至家人競走林樾中莊及錢走江邊陳稍後一騎猝至陳擲珠串祈免既入橐復逼之陳大罵被三創度不免罵愈烈後一及唇吻決遂死騎沿江者及莊錢氏莊一躍入江錢氏手抱兒繼之人稱傅氏三烈

鮑氏

舉人經綸女武進士汪亢宗之妻亢宗病亡氏欲以身殉之舅姑勉以立孤乃止已而二子俱殤氏遂閉戶服鹵死康熙九年同邑士民呈請旌表

李氏

盛我凝妻結禍數載克盡婦道會鷓草時里有姚子卓脅同鄉勇樹幟抗命一時戎馬蹂躪婦女逃

亡被劫甚眾氏劫至武康之下溪灣伺其不備即投茗溪而死越一日屍浮於溪胸抱大石逆流二十里見者始收其骸天正炎燂肌膚不變胸石不解有力者不能脫數日後傳聞至家凝往拜之石即下蓋靈爽不歿云

陸氏

邵周書妻陸桐鳴女襁褓中桐鳴口授孝經即成誦後能詩及文桐鳴嘗戲語曰使吾女為博士高第弟子不媿也年十九歸周書屢躓有司試鬱鬱卒時陸方婉身念呱呱誰為撫不敢死抱孤隕涕曰天如不絕邵氏宗者我當作未亡人十五年聞者弗為意也謝膏沐却鉛華長齋綉佛以撫遺孤名之曰芳親為訓讀講繹大義十一就外傳以女紅佐脩脯芳年十五出應試即冠其曹陸因謂曰汝可自立我將報汝父於地下矣芳驚訝陸笑解曰戲汝耳詰旦禮佛如常命芳往別室錄所試文芳心動急啓戶已緘矣製衰經及遺命皆預存篋中蓋十五年中氏固無須臾忘死者從容就義雖古烈士何以加茲含殮之日容色如生二十一年子芳登山左賢書

日容色如生二十一年子芳登山左賢書

曾氏

林邦基妻年二十一歸林善事高堂克襄中饋林忽染危症醫禱莫效彌留之際若猶有待者氏知之許必以身殉目遂瞑既殮停棺氏曰虛其右以待我隣里以其事聞於邑令邑令某勸慰再三并頒粟帛始含痛任事亡何舅始相繼死附身附棺一切皆經紀周備忽自念曰永訣一言尚何待耶遂謝絕不食姻戚勸進不聽將歿猶梳櫛理容莊坐而逝計不食者十四日年三十有六其絕命詩云鏡裡菱花冷三年淚未乾已終姑舅老復咽雪霜寒我自從夫去人休作烈看西泠松柏下相與共盤桓時當酷暑玉質如生先是氏嘗鎔金十餘粒置懷袖間以備倉卒蓋矢志若此隣孀顏氏以貧乏將改適氏曉以禮義教以女紅卒無他志

王氏

貢生查梓妻也梓嘗客秦年六十娶氏氏年方十五挈歸浙中食貧操作者計十年許某歿月餘氏

卽服鹵死氏生平雖身處側室而笈言不苟杭族呼
妾為姨隣有富室妻多醜行每過亦呼氏曰姨姨氏
毅然作色曰汝何人亦敢姨我其持身嚴正類如
此嗚呼氏不媿夫世之為人妻而再醮三醮者哉

戴氏

吳錫妻年十七歸吳六年伉儷相敬如賓錫以苦
志力學染病卒氏誓以身殉投繯絕粒濱於死者
凡七矢志不渝隨吞碎金嘔碧血數升而斃事聞眾
為歛金建祠祠命名吞金在西湖孤山之濱詩歌成
集

孫氏

小字秀姑父母早亡歸其夫楊為養婦未成婚也
夫與翁俱遠賈他方烈女與其姑俱隣有狂且閻
艷其色百計誘之一日值浴閻從闕下伸手握其體
女嚙其手始脫去又伺姑他出闔其戶以漿奉女女
卽擲杯破其面面流血且涕泣詈之閻恚甚揚言我
夜穴壁來汝更奚避女懼乃密縫其衣表裏連綴不
可解姑歸仍炊茶以進而自服鹵計床死夜半閻果
至姑驚呼起視之女已絕矣時年十五云隣里嗚諸

官大中丞張脩禮收殮酷暑中顏色
如生立鞠閻寘之重典上其事於

朝建坊紳士共作
詩文弔之

童氏

嫁傭春者高良其舅陳四為輿夫傭巨商家暇甥
婦有姿色故虐使良不令與其婦合未逾年良死
四陰計欲以童獻某商為妾童哭誓彌甚絕粒七日
而歿里隣將狀其烈婦事於有司為四所阻而止未
幾四暴
疾卒

烈女

元

翁氏姊

年四十不嫁至正間寇陷錢塘與弟忠一家四
人誓結袂死於河姊曰河之死者穢矣吾獨尋
乾淨水死忠等赴河姊赴城陰
古井死焉楊庶夫有詩弔之

曹處女

名雪字玉英年十三善鼓琴十五工詞翰母沒竭力營葬年五十不嫁常自誓曰死作處女塚

至正間錢塘喪亂處女閉戶三日餓死楊廉夫弔以詩曰曹處女白雪靈母惜白雪靈抱玉真珠擎十三

學瑤琴不作濮上聲十五弄彤管不作花草情叮嚀媒與灼必嫁與公卿英英馬上郎貂帽繡衣裳官家

促處女願作處女郎昨日交處女幣今日催處女粧貯以黃金屋薦以白玉床大珠連理帶七寶合歡囊

大珠五十萬七寶百萬鎚黃羊尾如扇文雞若鳳凰置酒結高宴長跪起行觴處女誓慈母有死不下堂

慈母莫效志皎節如秋霜嗟嗟曹處女處女節獨苦事母終母喪母墳成負土白髮五十秋五十終處女

誓作處女墳南山華表柱荒城兵火交三日不開戶生作獨月娥死作黔婁女我作處女辭用激城中三

家婦

明

劉烈女

居江滸年十九許字諸生吳嘉諫女家樓臨南星橋五日競渡女登樓惡少張窺女貌美夜躍

上簷斫窗入女起大呼賊至父元輔驚起擒之隣聞斬門奪去且云密約以饑女女聞之遂閉戶投繯卒

訟之官有丁玉蘭為張謀賄元輔元輔故訴女蒙汚若為姦狀露者郡守劉夢謙疑之念即如若父言囚

無死法乃故緩其獄數日燕得烈女死及元輔受金狀與司李劉某共治之一訊吐實論張死先是女死

三日嘉諫往弔盛暑顏色如生以法驗女眉實處子拊屍大慟烈女眼忽流血血直激嘉諫面嘉諫手拭

之乃已而丁玉蘭一日晝見烈女責之叩頭自搏立死時崇禎庚辰歲也

貞女

明

陳氏

主事鏞女弟許嫁禮部員外郎孫迪未婚而迪亡柩還家女告父母衰經至廸家見舅姑臨柩伏哭

盡哀遂服喪三年終身不嫁壽踰七十卒於家

高氏

高舍人恂女許郡學生陳文濠文濠病夭女聞計號慟製服赴弔比發引哭送及墓誓不嫁年七十卒

李貞姑

性端簡貞靜年十七許聘王亦可王年十九病死貞姑號慟幾絕屏迹小樓斥去鉛綺粗衣蔬

食形影相弔八載病劇他無所言但屬取王生像一訣至則已沒矣合葬生墓

郎元真

年十二許字郡人高瑞瑞出亡不返舅姑辭之父母欲更字元真以死誓父母不能奪一日從

容白父母曰許見為高氏妻勿獲嬪願一識其門父母許之具舟楫送至高既拜舅姑比晚父母促之歸泣曰今日豈有還理遂居於高數歲以孝聞舅姑憫其誠為之立嗣暇日舅嘗與真言其夫狀且云耳後有大黑痣真識之後有奸人假瑞來歸舅誓不能復辨聞其述舊事甚悉喜曰真吾兒矣元真曰語言或

恐偽潛察其耳後無痣辨非是拒之乃免為所污竟室女終身隆慶中旌表年六十七卒

徐貞姑

幼許沈麟為妻麟卒貞姑甫十九泣陳父母製服赴喪奉事舅姑以孝聞終年紡績不踰戶限

內外嫻親莫覩其面年踰七十卒部使者表其門

潘聖姑

五歲許孫登明以貧故未娶卒聖年十八方食聞計即推案廢箸而泣毅然請奔喪奉姑不得

遂蓬首垢面坐一榻或竟日不食姑卒夫服亦將闋孀女奴曰我死當葬我孫氏墓七日不食而卒父不從瘞後園秘不傳適督學陳大掾閱卷假寐女衰經形見曰吾保安坊貞女潘聖姑也公司學校敦風化宜為吾表揚陳驚寤待旦傳邑令廉之具得其事即詳臺使者具題報可附祀表貞祠同時又有李三姑者事與潘同

許三姑

幼字蔡九經未嫁經卒許年十七聞喪即持剪刺喉流血救蘓奔喪躡登姑樓剪髮食淡勤

女紅雖至親不見其面壽八十七順治十四年建坊旌表

周招姑

周友聞女幼聞潘聖姑事索其傳求父訓詁父訝其語女曰詎非分內事耶年十二許配郁從

善從善病卒計至女時年十八欲往視舍父母斬之藏鹵筒中俟昏定自盡又使母姊委曲諭之曰兒郁婦也誓不他往無何郁姑病蠱危甚請往問父母默然時方製衣取剪自刺母知不可奪偕往至郁中堂索孝服拜夫靈几易服拜姑病所事病姑朝夕不離左右湯藥必親割臂和羹以進姑疾愈為立後嘆曰吾無憂矣當效潘聖姑報先死者於九原耳絕食數日死萬曆乙卯年二十三

凌淑英

太守凌立女孫七歲喪父不妄笑語年十四受

日委禽之先唯命今日非母所能制也衰經入門撫棺哭幾絕移晷乃甦起拜舅姑坐卧一小樓服闋又二年以病卒先嘗製指環二鐫二字曰守貞曰完璞病將革解守貞環與姑曰以此報姑解完璞與母曰

以此報母年纔二十有二時萬曆丙辰

丁貞娥

大學生魏某聘為繼室方委禽太守以豪右言置魏獄娥未之知也夢黃玉杯墮地碎詰朝謁

於父曰夢何祥也父告以故且曰魏郎病疫危甚而太守怙過不自悔奈何娥曰計莫如誣服出獄即不幸得正而斃矣父如言緩其獄出抵家卒娥聞慟哭請往奠父母不許以死請母與俱往至則撫棺躡踊哭幾絕次日呼其二子前曰余與汝父聞名耳然義與之齊豈以死生易哉我誓不出戶守汝父喪或止之不聽親媪咸驚嘆三年坐帷中哭泣朝夕奠如禮服闋始歸寧父母教二子成立為諸生有文名年六十六卒虞司勳淳熙為之傳且請當事旌曰貞娥

吳柏

孝廉杉女弟許字陳允璧將嫁允璧卒號慟誓不嫁或以微詞動之輒闔戶自縊父母憐之乃許歸

陳入門泣拜姑嫜曰今日得稱歸矣子亡婦在子職即婦職也布衣操作為陳婦七載病瘵撫允璧之柩

一慟而卒栢能詩有集曰樾
陰吳宮詹太冲序而傳之

沈四姑 許范國璋璋甫十五疾不治計聞沈固請視殮
已服斬衰稱未亡人范貧甚三孀共處養殮不

繼女安處無異志守貞
四十五年五十九卒

沈三姑 受何宗祚聘未婚祚卒沈號慟願叩夫柩死且
瞑目母不得已許往奔喪哭奠如禮迎之不肯

還日事箴紉供堂上餐及舅姑相繼歿罄嫁時奩具
治喪葬畢遭歲歉斗米四百錢晨起操作飢則飲水

一勺侍御楊廷筠聞之月贈粟
帛年七十七卒合葬孝子墓

國朝

王四姑 許配徐天禧未婚而禧卒哭奔其喪無二志服
闋舅姑諭意不從絕食而死臨終言烈女不更

二夫吾今得死所矣時年十八
康熙十一年題旌入表貞祠

盧貞女

全人聘為繼室未成婚而全人死泣請過門行
三年喪上無公姑下鮮子姓熒熒孤立守志不

二夫有遺田十畝餘巡撫范檄
蠲其役卒後題旌建坊湖畔

丘二姑

父應昌母萬氏年十五母疾刲股以進母疾頓
愈仁邑鄧貞聘為繼室未娶而貞死二姑聞之

慟哭而誓曰身既許鄧矣敢不為鄧守乎即衰經過
鄧宇其遺孤艱苦備至終不移其志焉康熙十七年

有司
旌表

郭氏

海寧孝廉斗山女錢唐吳唐所聘也幼涉覽書傳
明大義唐篤行嗜古學使彭奇其文拔冠弟子員

食貧攻苦以疾卒氏哀傷欲自盡父母驚救之氏曰
父母以兒字吳即吳室婦也欲兒不死必令兒往一

哭從之登門拜姑孀畢憑棺慟絕即服縗麻守總帳
於百日内厝棺於祖墓側翁姑又相繼歿子影皦皦

父挈歸海寧衣縞茹素不聞笑語甲午寒食請於父
日兒不奠吳氏隴久矣願一往伏地悲號哀感行路

自此奄奄不起一旦盥沐向父母訣曰兒以兩大人
年高不即死為弟尚幼耳今弟已成立兒當與吳郎
同穴一笑而逝室聞異香許尚書
汝龍作長歌弔之紳士屬和甚眾

沈氏

下扇里沈瑞春女年十四許字范國章章工文辭
與貞女同庚年十七病歿女方同母飯聞計驚愕
失箸隨遭母喪晝夜號慟有錢姓為執柯強持其父
曰汝弟允女自不敢逆貞女聞之截髮毀容鑿戶自
縊小婢奔告父兄排闥救免祖姑王重其志節捐金
葺一尼菴居之旬日步歸告其祖姑曰非所宜居也
仍棲母家獨處一小樓勤蚕織以終
老六十三歲卒巡撫趙 題請建坊

顧氏

年十五許字茹廷祚未幾祚卒氏聞計即稟命父
母欲往執喪父母弗許固請乃歸於茹莫而不泣
人怪之氏曰吾未成婦禮不當泣從一而終義自當
奠遂稱茹家婦事舅姑以孝聞立姪之案為後教誨
成名儒年八十餘卒之案歿婦姚
氏亦苦志守節年近八十而亡

計氏

字同里陳桓桓負武勇甲寅征聞歿於陣計至父
匿不以聞氏竊知之慮更許遂絕粒誓死欲往奠
父不得已從之既至勅與人歸曰今日從一終矣桓
家素貧舅姑老而病俱力辭氏曰吾既受陳聘死且
為陳鬼貧何懼日勤操作以供脩灑舅姑踵歿家愈
窶或日中未炊氏夷然啜清茗數甌無怨色兩遭火
災氏獨奉先人主及桓畫像奔出餘俱不顧可謂諳
於大義年六十餘巡撫黃 題請奉

旨建坊使顯捐
貲葬於葛嶺

解氏

名坤元解仲良長女許字某氏母亡仲良貿易吳
門坤元偕弟妹持門戶足不及戶外仲良續娶余
氏隣惡少執柯也惡少素以舅事仲良至是往來益
密一日伺余氏他往潛入內室調謔焉坤元懼遂服
溲腸裂而死邑令董以
激烈全貞扁額獎之

李氏

名姝壬辰進士禧熊女孫父垣茂才授徒外舍有
友張斌客武昌使子仕華來學遂以姝許字焉踰

年仕華卒嫁年十八踞父前請終志曰兒意決矣願
廢房以棲食不足以十指補之舅歸喪服出見舅曠
眺曰吾不忍復見此也遂去武昌不返既卒嫁親爲
迎櫬歸與姑合葬於金沙灘仕華兆其傍蕭山毛奇
齡爲
之記

